

5563.8
4053
v.2





春村先生文集卷之三

序

襟翁自序上

粵昔聖祖龍興丕啓文治一洗三韓夷裔之陋
宗繼極垂運毓慶篤生英廟天成睿知克配姬文
讓寧遜位適成父志洪惟我孝寧大君以傳次之第
幾嫌達韜同於之越而文身清權至德駢美虞仲方
是時邦錄鄧隆宗文繁茂而詵詵和緝吁嗟乎麟趾
螽斯六世有諱某以剛直不阿事昭敬王名聞一
國號退憂有孫諱某登第當北人用事作詩見志屏

居耕釣及 莊穆王改玉始乃出仕無何黨人構禍
以餘怨間中公自是絕意宦達終老大嶺之下號雙
溪翁雙溪公之四世孫也年十四先君子卽世與弟
萬春承教育於王考日省公日省公拊而泣曰余聖
神之後也自前世常顯功名著於竹帛世德不貳絕
於余乎汝父早殞所望惟汝余雖死汝其毋忘余志
夫孝始於事親終於事君立身揚名以顯父母孝之
大者汝其欽念哉泰春俯首受教眷眷服膺而志氣
凡下才品滅裂年過三十學無所成屢中鄉解而輒
屈南省丙子歲先妣棄諸孤仲及家督同時隕闕天

稼荐禍才僞短折前後六七翁乃喟然歎曰我其顛
隤乎聖人有言曰四十五十而無聞其餘不足觀且
人之必欲顯榮者以親故也余獲戾于天二親俱亡
雖欲榮誰爲榮遂廢舉業優遊取適以書史自娛晚
更浚惟以爲陸先人之所托畫一身之所期埋沒畢
世罪孰大焉國有慶則東科庭苑時或應赴而亦無
必得之心也翁天性寬柔不報無道與人交一視無
別而中自有介人或目之以鄉愿亦不辭焉嘗作圓
方說曰天爲圓地爲方圓者理也方者形也理先於
形形後於理理濶而無滯形定而有分圓者近乎仁

方者近乎義周徧而廣大者非圓之體乎一定而不
易者非方之用乎君子之以之也法乎圓則大專於
方則偏圓方互資仁義並立然後德不孤而體用成
矣大哉圓乎萬化之源而百行之本也圓或可以獨
用而少悔一於方則有吝矣然此可與善用圓者道
不善用者歸於流矣可不慎歟觀於此翁之所存可
知己家仲國子君孝友天出文辭敏贍非流輩所及
常曰是第吾所急也不可一日無及死哀慟欲絕皇
皇若無以爲生文以叙哀凡數千餘言常恨世譜之
無傳自大君以下十一世行蹟哀爲一牒曾王考至

先考妣別叙言行肇卒又略記弟妹事實及殤冤諸
志合十三篇以成一家之乘川城古稱仁賢之邦風
流篤厚文獻雷聲及先輩既遠型範漸微儕友名勝
亦皆淪落四風聲氣俗日就渝薄於是作古詩十二
章以寓傷時感舊之懷平生愛酒酒戶不寬數杯卽
止止輒思之而家貧不能常釀又不善飯得酒力必
進家人以此常沽而飲之人有斥之以高陽之徒亦
不恤也有酒詩四篇愛吟詩亦未嘗多作意到則作
而不深於聲病格律惟取冲澹蕭散嘗曰詩本言志
三百篇之發於咨嗟咏歎之餘者自然有音響節奏

而不能自巳何嘗費力雕鏤神頭鬼面以求其驚人
哉古今之詩凡三變而律詩出然後言志之意亡無
復古人之風矣安嘗竊取朱夫子之論選詩語以爲
作詩準則而庶幾焉非曰能之蓋謂詩之本體然也
於是作古風一篇又曰立言不朽君子由之要以達
見言信立言之義曷可少哉終古聖賢未嘗有意於
立言而言自合於理蓋有德者必有言而因以不朽
焉詩書六藝之文是也然則立德立言何嘗二而求
之哉進德者乃所以修辭也自以喜看大家文字如
韓柳歐蘇無不貫穿而才力淺短卒無所成晚更回

頭反求乃曰是皆古人之糟粕何益於身心悉去之
專心於經傳而於庸學尤致力焉精衰善忘隨得隨
失又曰萬物之中人爲最靈者以其能踐其形也堯
舜之建中孔孟之盡性皆所以踐形而其具與人同
不可以他求也今以不美之質求反其性非百倍其
功不足以致之乃反悠泛虛老以終歸於自暴自棄
之域其爲不仁甚矣遂作四章吟憲難以後不莫厥
居始遷于春陵因其居而自號曰春村後十餘年又
遷于東邱以爲終老之地前有櫟樹自生可愛遂以
名其齋仍號櫟翁爲之記又有櫟齋詩蓋自況也自

幼少睡及飽經粿威神不定帖當夜而卧目不交睫
邪思妄念流注膠集不能自制遂乃著心於誦讀要
以退雜思而引睡魔馴致成癖咿唔之聲不絕於口
於是知者悲其志不知者以爲狂易老婦從而譏曰
翁平生好讀不見其效乃今垂死有何所期而自苦
若是翁笑曰嘻是何言也劬書士之本業死而後已
豈可以老耗而便休昔松月先生九十有一病旣篤
而猶不廢誦臨終喉間微聞有聲及氣絕然後聲隨
以斷篤行君子之事吾何敢望也然乃所願則亦惟
是也鳴臯子燿卽退憂先祖宗孫也年十九登庭科

才詞英妙擅名一代四世聯第榮顯傾朝惟是論議
太峻基於一邊人以宣川守爲權人所構被極禍湛
宗通國至今冤之子孫仍替不能自振有十三歲兒
爲人雋爽才且銳可以起家聲翁憐其早孤失學丙
戌夏携而南歸授綱目見解日就翌年夏得奇疾死
舉而瘞之文山下季君之塚傷恫宗門之逾極文以
謀之上之八年癸卯翁年八十立春日作詞曰八
十春容易過百年壽且如斯平生事有何做點檢來
空自愧渭川漁父鷹揚績那能望淇澳君子旣耄戒
庶可追新春喜氣滿天地引領西望兮荷蘭殿上爽

業基二月朝家設誕慶之科於青島翁蹶然喜曰是
國之大慶也環東土血氣含生之類莫不延頸而蹈
舞況此宗英世祿之遺裔乎幸而不死獲覩千一之
盛際余何敢自諉於老耄而退伏乎將欲隨多士不
荆園頌國祚之無疆痘氣梗路遂不赴

櫟翁自序下

甲辰四月翁以宿病扁痞之症逾月沉痾病中有述
懷詩曰少年浮浪謬期搏遲暮方知自暴慚世路風
波身外事人間名利夢中談一心都付秋塘淨萬慮
俱空菽味甘誰道老工猶燭炳嗒然癡坐似禪參蓋

自悼也昔朱夫子跋老杜同谷七歌陋其卒章歎老
嗟卑之語曰人不可以不聞道也翁之此詩尚或免
於夫子之譏歟少日夢江左翁以一幅篆書授翁狀
如輪囷而三回書篆五色斑斕謂曰此無可傳君其
持之覺後了了至今留在眼中而無其徵是誠可異
也昔韓文公夢得丹篆此則文起之兆於翁太不近
時江翁棄世不久心常景慕故發於夢寐歟有子婦
柳娘嫠居三十年善事翁今年冬死於五日之病翁
哭之慟曰是余之罪也夫是余之罪也夫而曷辜焉
其藏也有訣語數千言翁自是益無意於今世事神

精希夷有省有不省而猶不廢簡冊之閱晚得道德
經喜而讀曰老子之道雖不合於聖人其意亦欲脩
己治人而當衰周之時閭世人之文勝質喪要欲反
樸回淳故其言如此所謂絕聖棄智之語天地不仁
之說非是本意如此也實亦憤世之言也自漢以前
專用其術上而為君者能行恭默之道下而為臣者
亦為清靜之治卒成富庶之業及晉之世狂誕之類
盜其糟粕而托為玄虛無實之談欺塗一世遂亂天
下是豈可謂善用老子之道者哉今之時亦文勝之
世也巧偽漸生元氣都喪而風謠俗尚日趨於浮夸

不誠之域翁之所以讀此者非是尊慕玄牝谷神之
妙也蓋亦取夫矯俗立言之深意也使翁苟得意而
經世其轉移時措能得玄元遺意而使一世回淳而
反樸也歟

金潭巖實記序

晦庵夫子有言曰先祖有善而子孫不能知是不明
也知而不能暴白以傳於後是不仁也噫不明不仁
是固爲人子孫者之所可懼而無其善而惟務闡揚
亦非顯其親之道也潭巖金先生當喬桐初訖潰之
日孽臣睢盱賊機潛伏而在朝諸賢不量時炳幾方

且盡其匪躬之節不避射影之弩瞻烏之慟匪古斯
今則吁亦岌岌乎危哉先生以喬木世胄處去天尺
五之地乃能瞭然遠眎高舉深藏卒之超脫禍網考
樂永終而與古之天遊自適者相期於颺塵滅沒之
域其志可謂悲矣其迹可謂微矣嗚呼先生早悟誠
明之學平生講磨無非修己治人之道則固不可謂
之漠然無意於斯世者而遭罹屯難曾未能略試其
蘊卷懷埋沒終歸於潔身果忘之倫茲豈非斯文不
幸之憾歟迺者先生之孫中樞公請文於訥翁先生
叙其事之始終甚詳而載之石而豎之遺墟之上又

徵大山以下諸名勝記跋之篇以揄揚之於是遠近
章甫莫不尊慕之詠嘆之播諸聲詩殆將累數十章
而使先生之高風逸韻之幽隱不發者煖然暴白於
當世而輝映於千古夫子所云明且仁之子孫者其
不在於斯耶若是者儘亦無媿於顯其親之道也歟
中樞公又嘗欲掇拾遺事之散軼者裒爲一帙以圖
傳遠而未及卒業公遽卽世矣今其遺胤弘景等慨
然用心始克蒐輯首以秋江師友錄又據先輩遺集
中語並與其輓詩二首而列錄之且以前後所受碑
文及讚慕諸什次第編附合爲一冊以便玩閱其亦

可謂克成先志矣。以泰春忝在外裔辱命誌其顛末。自惟晚出無所識知。輒述賢蹟而列名秉筆之次。有非其分之所安者。蓋嘗以是辭焉而不獲也。乃敢竊取朱夫子之遺訓。數以爲說。著其顯親之至意。且以紓夫景賢尚德之思云爾。

芙蓉堂重建詩序

芙蓉堂夏山成先生燕居之齋而寒岡鄭先生之所命名者也。噫。世代既遠。風範莫徵。而師門之引喻稱賞。乃如此。則顧名思義。先生之所存庶可想見。其髣髴已竊嘗欽歎而景慕之思。欲一躋遺址。復挹清芬。

以紓夫曠感之懷者宿寫頃年有事弔山經由伊水
之上祇謁先生之院仍訪舊遺堂則茫為灌莽無可
識尋矣於焉徘徊四顧感慨不歇而悼芳躅之已逝
悵名區之長湮迺者先生之孫祖寅甫為能鳩材蓄
力縛得小亭於舊壚䟽荒穢斥砌塲林園池臺亭亭
有致而上舍洞氏又作小志長律道其顛末甚詳
春於是得以讀之踞而歎曰於乎休哉亭觀之興廢
雖無常苟非子孫之賢篤於奉先而勤於幹業其
能使百許年隤蕪之先蹟一朝燦然重新而杖屨
馥如復覩於今日也哉然則是堂也不獨為遺蹟

慕之地而已亦足使游焉息焉之人士像想
奉饗歎而惕然加其省勵矣斯不亦有補於世教
萬一歟於乎休哉泰春聞風起立不勝燕賀之喜而
君遠老且死矣不克扶曳登臨齒於善禱之列敢以
燕語聊寄東湖緬懷之歎又次其長律以致不盡之
意云爾

臺亭小集序

粵在癸卯首夏設耆老之會於茲臺臺之名會老也
始此時雪齋權先生以瀛閣先進壓座李騎郎槩妙
年登第簪花趨蹌於臺下一時名德之重風流之盛

至今焄焄人目矣迺者鄉之後生悼芳躅之逾遠慨
勝地之長湮增等臺址經紀亭觀創役之日適襄陽
邊觀汝戴恩行過有諗於衆者曰今之宿德長老
雖不及古昔而邊君戴笛之遊適際茲亭經始之初
邂逅榮耀寔符前事又有成注書用汝在是宜辦得
小集以追倣癸卯之會乎衆皆曰諾於是有觀汝之
舊者莫不聞風來會會者老少凡三十有六人蒼顏
白髮斑荆序坐丹葩彩衫輝映澗濤笛夫奏技觀者
如堵霎時光景依稀昔年事遂列書姓名於卷末以
附臺亭古蹟於乎盛哉秦春於此竊爾重有感焉今

去癸卯己四十三年先輩之笑談風味日遠月忘而
當時奔走於弟子之列者又皆淪落殆盡泰春獨以
貌然桑海餘生濫署於列錄之首倪仰人世寧不怛
然興懷乎遂太息而書之後之登斯亭而覽斯卷者
其亦有感慨不歇於斯也夫乙酉八月十八日書

世契序

宣城金弘弼幼輔甫攀其先甲稷帖詔泰春曰弘弼
生晚不克以陪先友歡娛之日今孤露衰懷死且無
日矣攀慕塵影感賔逾切將欲與契家子孫追躡前
事以紓夫永懷靡及之慟賢其亦有意於是泰春敬

受奉玩涕血交零仍竊伏念我先君子於尊府文托
契最早且密其平日趨舍游從未嘗不與同何獨於
結義講好之事而不相聞而相須也哉不幸先契之
儲在先君子棄代之後使先君子獨不得聯署於諸
公列錄之帖不肖痛恨於是焉其無旣矣安敢以是
自外於諸賢先誼之講乎且泰春獲戾于天二弟俱
殞婢婢孤寄常欲移其睦於朋友竊自冀有憑有庇
敢不樂為之從初輔甫善其言而悲其志遂以徧告
諸同志以四月二十八日約會于丹邱講社論定規
約列題名案各家子與孫兄若干人而永嘉權正行

鳳城琴庭協此二人者則與泰春同其隱惘者也又
先友從子之聞風願從者並皆許赴而同事焉是則
同室周睦之義也酒既半幼輔甫作而言曰世契之
人有兄弟之誼而世故紕全人心易移豈不重可懼
歟咸曰脊矣言何其慮之深而思之遠也於是泰春
從而爲之規曰凡事無信不立朋友之義惟信爲大
何謂信耐苦之謂也況所係既重乎是尤不可以不
信而久也夫以是信傳之子孫而永守勿替圖惟厥
終實亦事亡如事存之一道也凡我同人盍亦敬勉
之哉

霞巖既望會序

久矣吾東人慕華之甚也夫溪山之勝水石之奇其可觀而可居者或因其地名或取其形似必藉中國之所嘗擅美者名之而其燕喜也遊賞也亦必追躡乎古人已行之蹟然後方可謂之奇且勝焉此壬戌既望之會所以倣象於蘇仙赤壁之遊而天下後世之所共稱願者也在昔萬曆年間有黃愚叟閑景退兩君子者就其所居之北洞川石勝處命之曰赤壁日往來其間而諷詠焉是皆出於慕華之心而取其形似者歟自是以來世之慕古好奇之士未嘗不聞

而樂之皆欲一往觀焉獨未有能為挾仙泛月之遊者上之十九年壬戌之七月既望松坡石灘二大老聚遠近同好之士乃於絃壁之下舉酒相屬一時名德之重風流之盛至今播在人口吾東人慕華之心於是乎徵之矣迺者霞巖主人李景裕等山楹於此而游息之又於丙戌之既望約魯谷白山諸老伴敬古事而設勝會於是賓客會者且數百樽俎既序肴核雜陳琴歌互奏簫鼓間作又縛得一葉之舟泛之溪泓而沿洄上下激昂千古誠浮世樂遊之稀事也余嘗聞古今人不相及今觀景裕之辨此遊乃能

企及於二老遺蹟而其所施設名物又皆略倣乎蘇子當田之所共樂則余之向所謂慕古好奇之士者其在斯人歟余於此益信吾東人慕華之甚而重擊節也遂乃略叙顛末而志勝焉後之覽者其必以余言爲不誣也

記

櫟齋記

有樹曰櫟自生東邱童童成蔭春陵子等室其傍莫其櫟翳剪其叢柯盤桓其下而撫愛之名其燕居之室曰櫟齋客有過而難之者曰右之名齋者或以山

石或以松竹必取物之奇且美者署其櫺蓋非賞趣則託操也卽其所取入之所尚可知已今子奚取於櫺而爲之名乎其賞趣歟託操歟夫櫺木之賤者不適於材不周於器無山石之奇趣茂松竹之貞操樸樸離奇於林總之中匠石過之而不顧畸人遇之而不賞若是乎植物中之賤且棄者而子獨取以名之不亦戾乎春陵子嘖然而笑曰固矣夫子之爲說也子徒知櫺之爲可賤可棄於品彙而不知余之爲賤棄於吾人反有甚焉固矣夫子之爲說也豈不曰擬人必以其倫乎物莫賤於櫺名我固當余櫺之論

也少也賤老而莽既非需適之材又無諧耦之行攸攸恤恤塵出塊入而舒翹揚英者賤之如撇芋引類援勝者棄之以顛愚樸拙無與朽老林壑是固人類之最賤最棄者櫟賤於物而爲砂磧之散材余棄於世而爲草莽之散人以散材而名散人不其宜歟彼山石也松竹也奇則奇矣美則美矣非我有也非我倫也我何取焉子不聞名者實之賓乎無實之名余不取也客唯唯而退書之壁以爲志

東邱記

邱之以東稱自西塲謂之也西之高塲不知始於何

代吾李之居于此今三世古老言三韓時有皆丹部
曲其堡墟狴基公田至今可指認豈以塢在部曲之
西故名之歟丹水出於文山之下屈折南流水底皆
老石荒礫溪多伏流春夏無滂輒涸灌用桔槔峭崖
樹卉掩溪翳密往往成泓泓多白小土人採之悟溪
之水發源於蘆峯之麓又南下十里許至西塢前石
小水緩灣淪渟瀉值曠不渴民多賴焉東迤南匯與
丹水合南行數里至虎山下兩岸陡狹如疊叢巖斷
齧溪水積焉至此而山之東西來者皆攢聚累積盤
紆關闌其間名山水而村者十數西塢最舊東邱處

二水始交之上中盤大陸幾百畝叢茆荒棘彌望莽
翳亂石嶙峋錯若置碁抉其穴則脰外相糾搜其根
則蹄股交綴突怒偃蹇負土而出者殆不可數土皆
墳壚青翠窮其底數尺盡水道餘土若非造物者始
判清濁逞其詭竒必懷襄之日盪薄爲邱陵也土人
之不田不宅意或以此歟始余卜筭人多以是病之
然羣山控匝遠而若近朝帶獻媚目謀無厭枕席而
卧神夢清美居之樂如斯而已足矣復何求焉或曰
然則宜書之乃書以記

會老臺亭命名記

清溪白磔之上其曠然而爽者巖然而詭者皆可志
以玩賞今姑取其最著者名之會岩則所謂會老臺
者也循巖下數步許有老石隆然偃卧斗八溪畔者
龍巖巖之少東盤陀側石可坐一人其下溪流屈折
淵渟可以垂竿遂名釣磯釣磯之石與龍巖相對如
門水瀦其間濺可數丈廣纔藏躬底側深洄紆一
溪之魚盡集可置簪乃命之曰魚淥取詩之鳬鷖在
淥之淥也釣磯之傍得石臺穹伏溪潯以捍噴薄之
勢肩背隆廣可以環坐四人取爾雅所言水龜之形
名曰龜巖龜巖之底突而深隲成小广四隤而下西

西一竅北開小穴連溪水中得小陀容坐以死風雨
亦可作雉淪著名以茶窟據龜巖磯窟之會累石為
砌作老亭直亭南五六步巨石削隅而蹲俯瞰溪泓
關闌臺曲者為虎巖總之賦古詩八絕及十景律絕
以紀其實若夫風烟景物之勝人物魚鳥之樂隨時
變幻而不可窮者遲亭成同好之士其尚有以追述
之以盡余言之所不能盡者矣

跋

家譜後跋

完山之李系出

璿源而以大君為始者何也記曰

諸侯之別子爲祖繼別爲宗蓋言別其祖而宗之也
此吾譜之所以自大君始以爲之祖而不敢上係于
國譜者也於惟我大君以 太支第二清權至德勿
契乎周之虞仲而子孫之繁衍者殆不啻其麗不億
外裔之爲 璿派者亦克丕顯昌熾而 列聖之毓
慶越至于今縣縣猗蘭奕葉誕膺無彊之寶錄則我
不敢知大君之深仁厚德其不有光於吾東方長發
之鴻業耶於乎惟我先祖揭德振華以啓我後人者
其所由來厥惟遠矣至于獻納府君暨郡守府君其
文猷風烈又能遙趾前美克昌厥貽而譜系之牒尚

未有成使累百年流傳德業幾至湮沒無顯而後世
東雲無能考據徵信曾未知吾祖之有如是之德亦
未審吾宗之分爲某派駸駸漸遠遂至於路人之歸
則寧不怛然而痛心哉今據大君誌狀中子孫昭穆
之序而繼之以 贈左承旨府君下至先府君沿源
溯派僭爲修述間有言行事實之出於家乘與夫得
之見聞者亦皆採而成書以遺後之子孫而至於近
代則記之頗加詳焉以其親於濡染故也外氏源流
亦爲之逐載於世世配位之下以備參考是惟一家
之私乘非譜牒之通例也昔蒼石李先生哀述先譜

名曰興陽李氏家牒就質於西厓先生先生大加稱賞亦欲依其法而著爲譜焉不肖是牒蓋亦本於二先生之遺例也後之覽者尚或悲其志而恕其僭焉

王考府君日省齋記後跋

日省齋則我王考府君所以名其燕居之室而蒼雪先生權公之所爲之記者也府君平日凡行已處事未嘗放過及其晚年又加意修省揭之於室以志不忘恭惟先意不惟爲之自警於已而已乃其所以垂裕後人者蓋亦至深且切而泰春不能奉承鞭厲無所肖似又不能保守遺基漂轉僦居者有年于茲幸

今卜等奠家寢處有所於是而却顧榆景適追先人之志乃敢敬寫其齋名及記牘于壁上非敢以是自命于室竊取朱夫子以韋扁齋之義庶幾其夙興夜處服膺觀省得以少補於承先念愆之萬一云爾

先府君贈無為權公業詩篇後跋

昔我先君子取友心端與同里無為齋權公結義最早且密其相與之情非但里閭羈貫之舊而已先君早世無為公幸老壽康寧泰春以故人稱孤日從容進見公輒話舊娓娓繼之以感慨不歇也公之棄代今又二十有餘年聲容塵影日遠月忘而泰春與公

之遺胤正運皆駸駸抵死矣有時說及先輩遊從之
樂未嘗不慨然起慕而有每懷靡及之痛也往公之
孫思澗以先君子長律一篇見示考其年則在英
烈王乙未六月時先君子方盛年公亦志氣茂遠其
相須規勉之意儘非尋常唱酬之作也於乎偉哉於
今甲子已一周而手澤尚新諷詠之間庶可想見其
笑談風味矣泰春於是敬受而三復焉嗚咽不忍釋
手因諭于權君曰先君子無述作在子孫者不肖竊
嘗痛恨于中今幸獲觀手墨且適會今年使不肖遂
願誠若不偶然者請奉弁墨莊以傳諸後權君慨然

曰是惟先大人爲吾先祖作也傳於吾祖子孫豈非
兩家遺昆體先之至意乎脊矣言也是誠然矣奉者
安敢私焉遂惕然起敬略叙其顛末於後因追步遺
韵而奉還之嗚呼權君其敬守而勿墜也哉

五隱翁詩卷後跋

五隱翁平日善談詩頗識聲病格律往往警人余從
遊之久得其緒論而心賞之然未嘗一與之唱酬叙
述曾不窺其詩品之何如也日翁之遺胤袖遺卷示
余披玩三復不勝風雨溪堂之感也翁詩貼貼地說
道意致樸穩時出警句入人諷詠亦可見其才調之

天得也始之不與我相和者無或以我為不足與談
詩歟嗚呼惜哉翁嘯臯先生之孫意象軒豁言論開
爽不好流俗側媚是古家風味也與余間一歲而生
情契甚摯今不可得以復見矣緬仰疇昔為之太息
而書其卷云爾

朴達伯草帖後跋

族舅朴達伯父器宇弘紆姿性寬裕餘事楷法過人
遂甚大為先達之所賞識而草聖又往往多得古人
用筆意使其老壽加工當益奇偉余與家仲國子君
受知於公最早且深不幸公盛年棄世仲亦中身逝

去獨余潦老畸窮無人世之念有時追緬少日遊從
之樂潏然如桑海事徒增風雨溪堂之感今公之遺
胤粧奔公行草一帖間以示余撫玩想像如接風味
爲之怛然唏之觀其生動蒼古之妙最是書法之精
神者無或因其臨池之興偶會於心而得之歟抑平
日絕倫之筆不止於此而皆斷爛失墜收拾貴重者
惟此之存歟何其與米元章下蜀江山老墨之一得
相類也嗚呼惜哉後之鑑賞者其必有以辨之矣

雜著

俟命說

孟子曰莫非命也順受其正信斯言也吉凶禍福惟天所命非人力之所可爲今有人焉黑夜放舟出沒風濤鼾睡捨枕任其所之而可免於覆溺乎疫疹彌蔓天地一網混處其間恬然不避而亦可以無憂乎曰是不然君子居易以俟命且曰知命者不立乎巖墻之下夫命者天之正理也思患預防人之正道也行正道而順俟正理是乃聖賢之教也何嘗廢正道而行險以僥倖於禍福哉此所以立乎巖墻之下乃爲不知命者也惟當盡吾所當爲之正道以順受乎天乃是居易俟命之道也

化日說

古人曰化國之日舒而長亂國之日促而短此何以
稱焉蓋化國政簡民熙安樂無事故短日如長亂國
政煩民勞困於誅責故長日如短是豈日之隨國治
亂而真有長短也哉余嘗在家全冗叢萃百慮交中
心勞事煩不知春日之遲遲今僑伏溪山謝絕世念
終日孤坐無所猷爲乃知冬日之不短古詩云山靜
似太古日長如少年化國之日其亦類此歟

幹蠱說戒孫兒

蠱之九二曰幹母之蠱不可貞蓋蠱有事之象而九

二以剛陽之才應六五之柔陰子幹母蠱之象也事
母當以柔順承之不可盡其剛直貞固之道也蓋母
則柔而子則剛以剛逆柔則失中道而取凶悔矣汝
性褊剛好自用家本貧窶而用度浩繁余年歲多病
汝承當家事其責亦難矣凡人處冗襍則易失其性
多有拂戾之舉且汝母早廢積傷為下者承奉實難
而日用之間事或乖心則母子相責此必至之事也
以至顏色不愉或使汝母內懷不平而馴致情誼之
損傷甚可懼也汝心明孝至吾不必以是為慮而嘗
見汝少却溫慈豈第之容家庭之間未嘗見有閭閻

遜怡之語古人有言曰嚴威儼恪非所以事親也老
萊子七十猶作小兒啼以悅親心古之人事親有如
是夫此可以取則況幹母之事固可以貞剛自用乎
聖人之取象垂戒如此今演其義而訓戒之是惟余
以無窮之情望汝益善之意也汝其勉哉

經綸篇

古者取人德行爲先才能次之岳牧之薦九德之咨
尚矣周家選士俊士之論造士進士之法崇之以四
術四教順先王詩書禮樂而賓興之以告于王定論
任官先其德行而才能不屑取也降及後世選法多

端互有得失兩漢之辟召魏晉之中正考之以里閭
之毀譽試之以曹掾之職業然後八備王官以階清
顯蓋其爲法雖有愧於先王德行之選猶可以得才
能之士也隋唐以來科目以取士銓選以叙官所試
署詞章而已所按者資格而已於是操觚末技得以
階榮進之路勘籍胥吏得以司升黜之權選賢與能
之制無復遺存矣宋之六科差近三代之法而末流
之弊徒歸文具雖有鄉舉而取額不公又設太學利
誘之塗以啓全趨游浪之習其所爲教者既不本於
德行之實而所謂文藝又皆無用之空言適足以破

壞學者之心志於是明道發賓興之論伊川作看詳
之制而朱子私議又竊取二程之意究覈弊源條列
科制斯誠千古不刊之確論也據今之弊而校之宋
世又不啻倍蓰由今之道欲以正今之士其亦難矣
然則如之何其可也科目取士之法容可一切變更
而別立一道如周禮賓興之制以爲陶成實行之士
乎曰是不然夫時有古今道有當否因其舊貫而循
名責實則易爲功務立新規而徒取虛名則難爲効
必欲一變不流之弊盡復先王之道莫若且就見今
已行之科法而嚴立課程糾防巧僞罷去詩賦而只

存制策以諸經子史及時務切要發爲問目取其通
經識務詞理弘紆者其有不本經旨專尚華藻者並
皆汰斥至於四子之經六經之義則本欲發其疑難
而辨明之演其文義而推廣之在學者不爲無益亦
合依前取之而必須使之勿拘功令橫豎說辨且三
年大比則必以能通四子六經者制爲中格亦可謂
表章經學然今所謂業經者專心句讀費力記誦而
叩其義則茫然不知所對粗淺文字尚不能自做便
同沒字之碑今使經學者亦須各治一經如漢世專
門之學各守家法淹貫受用參選之後又爲發策試

之而命題依其所業之書叅以時務條舉辨問必觀其詞趣又於學校敦其教導培養本原而論其賢者能者於朝而黜陟之夫如是則士有定志文無淆雜而風俗或歸淳正人才庶幾成就矣

右貢舉

蓋天下之大非一人之所治萬機之繁非獨智之可運於是乎設官分職簡賢授能而古者官職不繁唐虞之時建官惟百夏商倍之而亦不求備周官制度先儒謂之煩瑣而其訓迪之辭曰官不必備惟其人是以官品簡整廩費不冗而庶官無曠公用有餘世級逾下官職漸夥冗官散秩紛然雜出而月費俸廩

動以萬數故光武以爲戶口耗少而設官太多詔令
司隸省減吏員四百晉傅咸亦以爲公私不足實由
官多爲國之道在於任官省俸唐太宗盡蠲內外不
急之官見畱文武員六百四十三人我國以偏小之
邦張官置吏倍於漢唐今以京官言之則自政府六
曹各衙諸院至于內史軍衛不可勝計而各司之中
皆有長貳一司之員多者數十少亦不下十餘以至
醫藥卜筮典樂司漏之任圖畫譯筭山澤坊部之官
亦皆有長有貳以外官言之則方伯連帥守宰之外
又有列鎮城堡之將司牧亭戍之官林然旁午錯置

間處至於寢即閒職亦設疊員內外諸官大略以千
萬計我國制祿本少雖一品之俸不及中朝長吏之
半固不足以代其耕然都計一國頒祿之數則歲不
下鉅萬民安得不瘠國安得不匱乎官職冗雜之弊
一至此哉不特此也我國調選專以門閥爲貴簪纓
世胄則無論才否必置清顯微門寒族則雖才俊之
士例分賤品此所謂上品無寒門下品無世族也傳
說呂望豈可以門地得之魯之三卿孰若四科苟有
其才雖牧豎販夫明主不棄苟非其才雖三后之胤
墜於皂隸矣又況門蔭白選其弊尤多今夫貴勢子

第則年未勝冠已覬榮塗朝占薦目暮登郎僚歷數
清要馴致大爵而問其學則目不辨文又問其職則
謾不知何事且夫子牧之任民之司命尤當慎簡其
人而近世守令多署蔭官未知其制昉於何時也又
設爲防限以爲某縣某州是蔭仕例赴不可以文官
調授便成令甲其來已久故凡饗利冒祿之流不願
科目發身惟求蔭仕捷徑超轉階資圖得墨綬剝民
漁利惟意所欲且武弁麤夫尤不可使典理郡邑此
輩自處與儒士有異不拘名檢惟利是趨而搖尾權
門求得名邑一以爲事上之賞一以爲陞品之梯若

何以利民而為國乎噫宦途多歧名器混淆而主民之塗炭日極邦國之耗弊逾滋若使命世之才量時審勢以矯其弊則必有所以變通更張之道矣然則如之何其可也捐不急之官汰冗雜之職並州縣省吏員勿限閥閥惟取才德絕祛廕調以塞私路武士則只專以折衝制閭之任而毋除牧民之官若有高蹈邱園茂才異等者論薦州里不次選用夫如是則仕路清簡而無僥冒雜進之弊浮費省減而有公儲充羨之盛矣

右官職

蓋自軒轅之後舜禹之征苗啓之誓師湯之征伐其

用兵行師之制必有可記者而今不可攷惟周官司馬之法昭載經傳其教練之數調發之制各有不同教練則不厭其多調發則不厭其簡教練多則人皆習於兵革調發簡則人不疲於征戰是故人服習而政優安上易事而下易使此周人之法所以爲善也其後世變漸生兵制日增而天下遂多事矣漢氏稍加變通設爲南北二軍李唐初爲府兵雖非古制無事則藏於農有事則朝徵夕發而命將以統之色目不繁分數甚明兵家所謂御衆以寡之法無過於此則捨姬周而論兵者其必以漢唐爲優乎我國亦用

兵之國也

列聖相承軍政是先內設禁衛各有番

軍所以壯其內也外置列鎮皆有屬兵所以捍其外也其編伍之制申令之法不失提綱挈領之要且循操約用博之道而休養操練無分農兵則我國之兵制亦可謂不畔於古矣然而色目繁夥額數浩穰搜括雖嚴而虛實相蒙試嘗舉其弊之大者而論之其

一有五何者古者七家共出一人然時勢之古今殊宜軍政之煩簡不同故先王雖不能悉遵古制四父子餘丁之法亦可謂盛德義事而今乃廢格不行不但四父子無餘丁使不幸而有一父子者隨口隨點

一室軍布之數多者十餘疋亦五六疋耕不得食
織不得衣傾貲敗產流通相屬此一也古者兵法本
無各種各號孫子所謂兵一而已者是也今也則色
目既多隊伍難充役於陸者或兼牙兵編於水者亦
簽束伍甚或數三其役者有一役束了他役又至無
事之時或可以左右填補而脫有緩急一時齊發則
一人之身何可二三哉徒見其東補西缺此實披虛
而百孔子瘡不戒行伍往往必有無軍之將茲豈非
大可寒心哉此二也古者二十成丁故未二十者無
役今也則呱呱黃口已充軍簿一歲之兒變爲十歲

三尺之童遂成丈夫苟充其額規免一時之責及其聚軍之際別雇丁壯以應考閱徒擁虛籍孰甚於此東晉之時以十六爲全丁而范甯謂傷天理夫十六中丁尚不可點況襁褓小兒乎此三也古者六十老而免役故國法亦然今以簽丁之難而年滿仍役如或得免則反徵其價曰除人情也小者攘其蹄噉大者指土地成契券甚至老死行伍而不得免焉白骨之徵侵及隣族是雖奸胥幻弄私斂之弊而亦莫非兵額繁多之致此四也古者出兵之法七家取一人其餘六人之在家者外足以應飛輓之勞內足以供

守望之助今也則盡室赴陣是空國也軍有餽餉向以應之家有父母誰復將之此五也凡此五弊皆能病國害民則雖有億萬兵何能藉之以爲緩急捍禦之備哉嘗聞治兵者務精不務多爲今之計莫若先嚴戶口之法民生十九以上自是餘夫可任者也勿令父子同居而別占田以分其戶雖十七八歲者有室則亦如之若未娶而見鞠於其父者其父從役則否年六十者唐制謂之中丁蓋以其年在可役未可役之間故通上下而名之曰中然其父死則當室而立其戶其父雖在年滿六十者免而以其子主之則

凡無夫嫠孀之外每戶皆丁壯可役之人也於是乎
汰其冗兵損其浮額只據時籍實數而家出一人以
簽之又用隋家貌閱之法令州郡逐歲閱其貌以驗
老少其容隱不實者里正黨正嚴科其罪則其戶百
萬其兵百萬其戶二百萬其兵二百萬戶之盈縮而
兵之多寡係焉有丁必簽有隊必充而荷戈執戈者
無非驍健彊壯之士安有兒弱充丁虛實相蒙之弊
乎噫今日良民避役之淵藪又有三窠宮寺藏獲遍
於國中一也高麗時僧舍只有七十二所而謂之裨
補所又有度牒法今則度牒已廢而僧徒無筭地方

百里寺刹如林家有數子例必一髡二也史稱鐵劔
利而倡優拙今優人之技冠於天下而遊戲為事卒
無身役三也此箇三窠避役之類一並搜括充填闕
額可無疊役徵族之弊而兵不可勝用矣夫然後揀
汰諸色軍號只存騎步水陸四軍之名以爲鄉兵凡
其編伍作隊及號令節制則依前勿改翊衛京師亦
宜省略名目只存訓練禦營兩軍分番上京以爲守
護且其無事坐食支費廩粟耗國病民多矣亦於兩
軍中抄選精勇之士得一萬人分爲二番半在城中
半在城外擇閒曠肥饒之地分屯力作以備京兵之

食則使國家庶可以寬良布之貢蠲徵骨之稅而民
皆安其業樂其生無作溝壑之捐瘠何苦講戶口之
錢論遊結之布以上下其可否哉

右兵政

誅

謀權慎初

正術

文

鳴庠天之生人也不類有才貌峻明英銳太露者焉
有才紆貌醇而攸好德者焉英而銳者未必其有終
恒見短折而無命其成就遂大顯世名立者多於醇
紆好德人徵之矣永嘉權氏子正術表德曰慎初觀
其貌醇實而不露驗其才藏銳而紆夷又好德以爲

之基年未弱冠已成法器宜可以顯敷壽考求其所
以歿且賤無可得焉今年春以疹疾死嗟其冤哉命
之微不可知可知而稽乎外者惟德與貌慎初既有
德有貌而羅天之祿何哉洪範攸好德福也凶短折
極也福與極是異道而乃今紛厖相尋於一人之身
然則聖神之言亦不可考信歟余一怪之慎初大人
以望八之年失此良子凡其知與不知無不爲之慟
且出涕余亦窮獨獲寔者意有所鬱結於人之少年
冤逝不忍開口說及自處以一椎無情物久矣今其
大人悼其無命而憐其埋沒涕泣求余之誅將欲以

遺宗黨子姓嘻乎冤乎是余之志也夫是余之志也夫遂咤若而罵之辭曰

半容之醇兮懿藝之紆衷德之好兮庸行之愉聲譽夙著兮謂吉其終方秀而閔兮而命之窮無子繩類兮有父冤咤天道冥漠兮鬼神殛驚焉辱已矣兮天壽同歸曷足怨苦兮達者庶幾

誄陶漁子文

陶漁子年逾七十神明不衰精力尚健凡兒時所讀無不貫穿記誦日出八里巷不以年德自重雖其燕私獨處之時亦必正襟危坐未嘗有疲倚倦惰之容

人皆曰是瑞壽也天所釐之其無疆乎乃以邂逅之疾一朝奄爾棄諸孤儘乎不可恃者是老人之康健歟抑吾鄉之運氣方蹇魁人長德連歲淪落公亦隨其運而乘化歟嗚乎痛矣辛丑冬余受室于伯公門下始得公之端序焉公天稟廉介貞悃為崖岸斬截之行少時頗褊憲諸子皆敏而善讀猶加忿厲晚更和豫祥順無一事卜急無纖芥忿懷此變化氣質法晦菴夫子之所亟稱呂伯恭者也既中貯繩約外又寬優善諧不問老幼人之見者莫不驩然愛慕而因加敬憚焉聰明強記一覽輒誦如已言上自典故義

文之經下至班馬諸子之書屈宋之瀏亮韓柳之精
英無不涵淹淳瀟證據論說滾滾不窮義而爲詞章
紆餘衍夷蔚然若大家數使其進而處於承明著作
之署其所以揭德振華黼黻皇猷必有所可觀者而
惜乎天旣厚其賦而反嗇其需也平生不喜述作作
亦不復收奔余嘗言于公曰士生斯世窮則立言垂
後太上之次也人人固不敢妄覲然各以其所能鳴
之以宣其湮鬱亦何所不可嘗竊有意纂綴家先系
蹟以及吾身始卒如太史公自叙之爲者顧才識淺
短未能也公其爲我詔之無何示以其所著陶漁子

傳及諸所作詩文富矣哉世未嘗多有也余既卒業
焉乃曰吾固有媿於李漢公亦不及於周情孔思之
韓公以有媿之見識編不及之文章庸有僭乎與其
收拾遺文有所墜失無寧今者面質究確得其是正
以信示久遠哉公笑而領之壬午夏屏跡山間與公
相處幾一月對討裒次遂成編帙凡數冊於乎是猶
可以垂耀後昆而傳遠乎哉嗟春於公辱知最早且
親其於死生之際宜有以不相背者方公疾革滄罹
慘毒無意人世不克奔走以候今茲寃寃之日竄伏
頓呻又不克臨窆哭訣泰春於公何其負哉至痛在

心不忍作韵語乃長言以叙其實以洩余哀公之靈
有知尚亦俯而唏之矣

誄成希源文

嗟乎希源生也者寄也死也者歸也吾於君何憾嗟
嗟希源壽也者福也命也者天也吾於君深惜嗟乎
希源行全乎彞倫文嫻乎軌範今於何復見如君嗟
乎希源義兼乎師友情比乎骨肉今於何更得如君
已而已而洞洞者是揚且而頌者耶頽頽者惟夷然
而曠者耶白首人間出涕而吮者寧惟失友之懷
而已也嗟乎希源死者無知徒使有知者難抑彼累

然扶衰而朝夕號孔懷之慟者猶吾昔年事耶誠不忍校淚相視而重自悼也嗟乎希源一氣隨化消滅同歸前緣未盡留待九原邪

詠徐穉承

宗胤文

老夫心弱今於穉承之歸不忍濡筆抒懷亦不忍終無一言以訣君家仲國子君之壻也仲早逝余老無一子始得君如玉之潔余視君以壻君事吾以舅拳拳相與之情數十年如一日也余將以寂寞身后之事畸惲無教之孫而欲托之君而有所期焉豈意天喪余亟回顧茫茫耶清明之物鬼神忌之君其得其

清而受其忌者歟抑由吾之殃而移其極歟冤乎痛哉君有二孤頤晶天之悔其禍而昌厥后者其在斯歟其在新歟既以是譬君之婦且以慰尊仲父氏之痛楚焉遂於悵而係之詞曰

人生百年草露漸兮未及中身六極蟻兮嗟君逝去彭亦悲兮既豐其賦宜厥施兮崑山片玉明尹姿兮餘事游藝洵有難兮升我之堂光滿櫺兮中心愛與如得琦兮來則我討開我疑兮苟假之年其晉丕兮歲月幾何曰篤信兮匪直余好設仲慈兮余游獲戾一命奇兮又哭輪姪契濶危兮君聞余苦涕泣顙兮

累爾藥容情溢辭兮適于仲墳理榛茨兮藹然仁厚
於在茲兮云胡嗇壽夭錯司兮尚冀餘慶二妙遺兮
持此以慰君無咨兮扶曳源源疇昔嬉兮今來無覩
但禱帷兮一哭長辭存沒噫兮

祭文

祭江左翁文代院儒

惟公胄于大賢篤稟間氣軼薄姚姒灑脫膏庠遂振
厥華爲世山斗心上經綸手裏貝玖密通前席玉色
敷如皇朝有制賢祖有書次第陳奏王曰嗟夫蓋
宣漢儀責我東隅矧爾思錄心學要符勿替講受以

振儒章稽首奉歸爛其龍光衿佩全集誦聲洋洋升
先生堂講先生篇嗟公樹立匪直光先俾我鄉邦永
有惠焉推茲一斑可窺其全蒼籀古法符呂玄達出
八義文箕精蔡思篇曰洪範王道是儀擬而不獻誰
我其知推其所有必應童求知筵撞鍾大小隨酬英
風所及疇不激愾文知軌轍士尚操槩宗我一方斐
然其作如屋有棟恃而無懼今其已矣怒焉誰訴

祭洪輝祖此全文

南陽之洪海東華閭累葉蟬聯厥有光烈於維杜谷
蹈海卓節遯于白山遂賁南鄉揭揭夫君丹穴襲章

夙歲老成人稱曰器風儀法如宇度恢爾內美洵貯
不事華藻且有其藝間發清微天若不妨可蹴鯨波
而無一售其奈命何我家於君三世有契從遊伯仲
粵自髫歲君於是時亦已肩隨爛熳相與不設畛陴
死生契濶庶幾以之君或有疑不鄙我咨我有所跲
必隨君行一日不見心焉若醒亦既觀止如得滿籥
壬戌之冬避沴丹山聚首園中文酒相懽山懷浦思
雪意風趣對吐襟胸百韵是就維甲之春偕赴京師
子約觀卿携手聯羈四人千里日有諧戲宮柳共賦
壚酒同醉論及風謠或笑或意湖山劇談耿耿畱耳

南樓惜別脉脉猶記由來晤語每說茲嬉歲月幾何
往事堪喜相思一念到老逾綢子既西徙我又擎憂
江雲渭樹一夢悠悠歲札維申天會百六生民薦瘥
一網盡掇子之昌兮而亦不慙塵世浮漚天地瞥瞬
嗟哉德門喪難何酷子逝既遽伯又不淑豐姿碩幹
相繼實闕子子仲氏其將焉托有兒克家其志不靡
他日成就曷量其至儀範宛爾君死不死豈敢父事
我實子視庶或規礪不負君期世故參差中心徒愧
曾與仲氏言及喟而嗚呼輝祖其或有知昔我與子
結誼何如異姓同氣人或證諸三臯在雷曾不捐軀

卷之三
一木就壙又未奔赴墓草再宿始進一脩嗚呼輝祖
其不我詬人亦有言信義不泯千古幽明一心可準
嗚呼輝祖其庶我允昔日相逢有酒必釐今來對樽
胡不勸我胡不我笑胡不我語故人在門子其何去
一聲長號厚夜無曙慨然四顧我將疇侶

祭西水權公裴文

惟公才敏質淳得氣之清陶成德器傍達尹理中無
伎求外著愿誠不爭華藻用拙自持惟善是譽絕口
人非自署藏六蓋閎淆漓闇然純德知者其誰餘事
文章雲爛風馳漓翰灑飭如誦已言溯洄學海涵濟

史園會神千古咀嚼髓沫推其所存可貴龍服時命
抹掇今古一轍五十從試匪獨貞曜白首登庠豈堪
後笑江湖滿地九閭迢遞歲暮林泉一任天劑幸致
康濟詩禮爲教有弟有子是友是孝家政日肥第祿
總道瑟瓚黃流筮永申休如何今者天施乖舛二賢
沉沉歲月道轉孝子先闕嘗藥不終漳濱西河交纏
隱恫營魄颺舉曰非適去高山旣頽景仰無處文苑
靈光一瞥空虛蕭條士類寂寞黨閭古史經訓誰復
迫陳餘生見聞其胥慕慕天禍我家先君早世公昔
拊我有淚盈睇操文致備以洩悲悵每對不肖拳拳

先契兄及第矣幾荷獎賜我未父事公實子視不穉
雖穀載同鉛槧誨化諄諄若飲醇醲庶幾遵守舊誼
無忝曾與伯胤誓言孔固余其可保世變多懼公有
賸馥燦然可讀盟手平日如奉拱壁世無子雲誰任
編梓嗟余不造粵難今極哭第喪子血淚相續惇獨
人世疇余憐恤公歸九原見我先人焉傳小子與死
焉隣瀝情陳辭敬酌筵前餘懷不盡留待九泉

祭柳季深滄文

惟兄與我一歲而生我在弱冠已飽厥聲不自鄙卑
願言識荆粵歲辛未送子館甥夙緣惠好遂接芝英

風儀峻明實副其名一見心許如飲得醒青春宿願
白首始成款洽相與歲且四更書疏或間心焉殷懃
對面晤語中自無萌我頑而憊子有其清我思其好
不知其衡嗟子之生不顯其榮胄子大賢世有珪纓
行年半百具慶盡誠兄弟六人莞和頃鳴亦越子姪
箇箇葱瑛詩禮訓迪何啻滿籛世稱完福天不悞禎
孰云今者降割而瘳血泣纔收喪難荐縈父子姪叔
相繼實精旬月之間四椽以並腸斷倚閭淚徹崩城
榮彼哀孤重我惻惻以子慈孝胡割此情每對令女
暗涕自傾子之生世若遠其程行以爲基文以爲畊

既富其具又珮芳蘅屢薦發鮮竟踰王閤彼衮衮者
寧不有驛而皆命也不足追評我欲南徙匪今所營
鶴山之陽風氣和平河堪釣汕野宜稻杭密邇子居
如鳥求嚶相期晚暮不勞將迎今其何心復問河
襄陽試苑舉屬深饋握手相懽罄倒缶盈後期早晚
玉亭溪黌胡不少留颺輪遽轟由來嬉遊曾不數輩
曾不濡翰酬酢鏗鉤浮世塵緣鳥度雲征今來八門
百感俱呈不與我言遽發仙輶憑棺拊孤涕泗懸睛
觴以侑送庶鑑衷明

祭姑叔丁進士

諱慎文

於赫名胄世顯天釐璫組裘箕詩禮舍菑飗于凱風
賁茲嶺陲允矣我公克趼前軼鸞鳴桂樹舉舉章蕤
早成法器旁達尹琪乃擅詞苑傲兀叢巖經綸締繡
有具可施瑟瓚黃流胡不爲綏三季登庠如摘領額
公獨蹇躓逶迤晚達神極又游蹇難何奇鵠原痛疊
西河淚漸歸然魯殿刼餘猶支歲暮小闌匪榮而嘻
世降氣漓禍福參差宜豐反嗇玄理難闢公昔館甥
光我門楣我祖於公眷愛超夷冰翁玉婿相得爲傳
時歲來往笑談熙熙及覩其時余方佩觿悲歡遞傳
人事遽移我家雖替公幸享願眇茲孤蒙幾荷惠毗

書諭面命門戶是期時及前事言發淚隨景慕一念
老大增累高山既頽吾將疇依世故多絀一哭尚遲
今來舉備我心徒愧警咳何處明日周暮溪山不改
物色凄其惻彼閨嫠哀此稚兒其誰覆將重我惻悲
天必祚胤公毋是咨

祭權平卿

正冊文

昔我先君契于尊府傾倒相好不面以肚我家獲戾
先君早世尊府詔余舊誼可繼粵在丙辰送弟館甥
覓緣申好益篤其情中歲悲懽靡不有焉相須相仗
餘三十年惟我與子寔同昆弟念子天賦富有根柢

既雅而秀又亢其藝稚年穎豎風邁電掣見者嗟異
謂卽早騫逮茲晚暮漸就繩鞭擊斂貯中外著強弼
遂不諧耦竟底落拓昔之見異今反嗤而天人曷尤
時命堪嘻豈無他人齊志沉泯嗟子阮窮人所尤悶
親厨匱滫妻孥啼豐不真厥居漂轉西東亦有賢季
發軔旋蹶分體孔懷同我惻烈對面輒歎間以書疏
在昔歲秋我寄僧廬長言一札傾倒心膂上憂老親
下歎墜緒因言踈慵契活齟齬旣以自哀又哀余衰
同人共咤千古一噫當時讀過未覺其悲乃今追思
果是訣詞屈指我友如子其誰人言子文攻取是宜

我識峻明大眼高揭間有迷作追古軌制有而若無
人所嗤睨子才甚高類世少與顧獨取全無靳機杼
晚畧周旋庶勿相違浮世多故別數會稀解袂江磯
倏焉歷時東雲北樹一夢依依子纏沈病我困憂時
曾未執手遽哭為位及其大歸又未謀訣幽明有負
一飯再噎瞻彼遺胤淘洗可必以此慰子天理斯質
流光駛逝宿草已老入拜尊府出哭殯門仰瞻俯吊
幽淚自瀉山瓢一醉胡不笑迓前緣未畢留待泉夜

祭陶漁子文

時風漸漓世畧沈晦懿德之亡秉彛之感方其在世

不法其矩及其無也每說前古拚風覓溯徒懷靡逮
嗟公生死係時興替緬懷平素不顯其耀淹貫之學
堅介之操豈雅之貌恂休之風矯褊用裕卒契于中
既積其義遂振厥華卽之溫如久處敬加早擅詞場
晚登膠庠時命不謀天祿又瘁隨羅順受我心愉愉
羨乎天光晚暮益腴家庭之肥經訓是蓄甞甞鸞鵠
其羽歲蕤純深不倦左鞭右繩其出英英以莫不興
施及後人瑟瓚黃流藐余頑愚夙蒙恩綢出入門屏
見勵彌切人事無常重我愴惻適老依倚趨向與同
一心耿結鬼神可通公昔有編龍門之軌刊落浮夸

三善村先生文集卷之三
四十一
餘子頻視山齋一劇宛其如昨鱗羽相須靈光遽撤
法門衰敗氣色日悽平菴風遠小山雲淒轉頭桑海
滿目秦荆鄉無善俗士失儀程追念盛時廓然芳菲
歲暮窮山謾自幽啼嗚呼曷歸前路泉遶餘懷碑
朝暮可披

祭李知事山斗文

惟公簡貞蹈矩潔廉成隅內植外腴君子之孚早登
天陞榮其羽儀出典八署一節險夷名途多蹇潦倒
中歲衡泌消搖兩忘身世晚叨異數崇秩鼎來位躋
八座弼貳鉉台高年邵德含章在田名登耆社旌招

屢宣一味恬退宸眷逾篤爰命寫真願言一覲稀
世恩榮焜耀昌時山林文席邦國菁莪嗟我鄉黨幾
蒙光烈會長獎院章甫攸則風範不沫宗慕逾摯云
胡適去祥極遽闕山頽樛壤廓然芳菲載詹總惟多
士增唏敬薦洞侑其庶歆酬

祭外舅權公正誼文

我之哭公匪直以舅出八公門卅載有九誼結之情
以師以友誠發之詔匪俗匪枉汲古之教處今之道
長言短語哀絃腑倒顧余滴劣百無一與趨向相殊
天品鍾公則冰清余豈玉滋中心感佩類類歷茲

公少剛直天馬脫羈生長法門眼目高舉傾倒彥聖
睚眦便語世好周容公不量柄曉舌興如遂致佗僚
滾藏白壁埋沒青蒿歲暮天地蕭瑟單袍江上草屋
星漏風颭安此冷薄笑彼饒豪書史以娛嘯傲自適
蓬孤志左風波世隘激昂今古談說崢嶸聽子貽孫
式穀其程家政日肥何啻萬籟晚景契濶非復窳咎
嗟公資芥天實厚昇滿腔惻隱并孩是死寫懷韶光
春鳥鳴機德以爲基餘事文薏外雖凌厲中實慈良
內而不出闇然其章隱約平生世無知者於惟天秩
仁必之授以是畢世孰云其騫石受無施自古皆然

我府凶矜無心世事仍之衰瘵久闕候侍書疏來往
幾承願言尚期餘日以遂源源鶴齡遽催雲海遼廓
愴念平素聲淚俱落嗟余負公俯仰多忤駸駸西日
宛轉東首自殮及塋一哭終違世故多絆遂及祥期
昔疾今猶又未洩臆緘辭送使東望惻惻人事永絕
天理隨泯一縷雖存無異旣殞公或余原疇昔有恤
九原朝暮餘懷庶畢

祭權孟範

正模文

世講之誼秦晉之匹年契之同潘陸之密騎吹夙好
鬢鬢逾切子才峻明我始望洋芳華聽缺蕉夢亡羊

志左蓬弧命直箕斗少日叢巖晚畧窮狗蕭瑟平生
瘦島寒郊虛帆世味海樓綳影時勞非吾到底撕乖
相視嗟悼一般幽愁搔首問天能無怨尤環顧舊要
落落星街平蒼草冪小山雲埋誰其醜者惟子與我
出門無適滿目磊砢精衰筋倦別數會稀一庚之機
源源是期尸約而負余一怪之而今思之世念已離
我無血嗣子哭冢子吾人賦命一向其躋幸君小郎
其器宜遂余心竊嘉愛切子視名登國子少雪父冤
君驩我醕永夕華軒一笑歸來世故隨纏隔歲阻晤
余疾沉綿君唯考朗神力尚彊宛轉餌藥幾回翹望

余未離枕君又卧漳謂是邂逅庶獲神勞何遽先逝
使我後咷八耄歸復在君何吁萬事寥落哀哉余孤
秋晚霜淒風葉助悲一杯奠哭尚或歆斯

祭宗叔父師瀛文

皇皇我祖遠自孝寧源深流長其葉炳靈猗歟遐憂
克昌厥華直聲遠颺運際鴻嘉絪組相聯暨于雙溪
風標峻整正路法輿器巨位躋晚畧南爲家于白下
四世于茲卓彼茅爺蔚然繼起瓊文懿德通趾前義
神遊葛懷灑脫糠粃門衰運剝畢世堪安公是伯胤
典刑克肖早承家庭薰沐詩禮敦行孝友餘事文藝

不屑諧世亢亢自持法門風範待公人知叔季早實
公獨享禧同牢適老其樂怡怡曰子曰孫滿庭嬉嬉
左扶右隨咸職其宜全福備世稱仁報天道如何
而不永造賢配先歿三郎繼逝禍難叢萃家業顛隳
臞顏鬢鬚暗淚垂垂晚景悽寒人孰不嘻公惟若固
隨遇理制小子不天先人早世兄弟三人弱植霜餘
零丁銜恤將母以居公閔偏苦眷拊周至依仰靈光
以事父事粵歲丙子天降我割禍延先妣仲又不淑
冢子姪孫相繼天閔悠悠人世痛冤曷極公泣謂余
家本單子患難存臻何以扶存有才如仲竟不大賽

天實祿我無望寒門惟是敦族百福之基爾宜先之
毋負余期諄諄讜諤耿耿留耳其何能淑中自忸矣
昔我王考早失怙恃他離北徙伯父是領大爺承序
式篤其友無分爾我視以同父扶顛持危得立門戶
追惟往事感涕盈袖嗟公厚德不忝前軌余侗而愚
誠未輸意敬慕一念靡日有己澤近高曾風傳家老
想像先古獲瞻床隤祥光遽閔南極已墜樑摧棟折
宗黨失庇先型寢遠祖範焉徵緬懷存歿百感俱興
嗟我門宗嶺外孤杖不立厥居世業墮替仍之衷難
支屬不繫凜凜殘緒瑩瑩孱孫於何依將惟願相睦

靡瞻匪祖靡愛匪族追源溯本一體同根庶幾式好
以貽來昆累世先兆各在遠地逝矣窮山未表遺誌
世遠人微懼厥荒夷公每幽憂言及喟而爰命小子
勾管位貲隨便取贏以圖易隧今與宗福協心經理
世故多梗恐或墜志為先之事收宗之責迪後之方
保家之則公既垂戒余有所受今當永辭矢言以奏
徒言匪難克踐可恻嗟余薄命劫餘殘縷無心世事
一死朝暮萬端悽懷寸管難該靈如有知其不我哀
橫罹阨會蒼黃南走不克哭訣使姪督脩君蒿悽愴
一氣昭感薄羞哀籲尚冀歆覽

祭宗兄字春文

嗚呼兄何棄世之遽也老親在堂妻子在室兄弟宗
戚皆在於是兄何遽棄而莫之顧也兄以哭子悲哀
廢食放飲者數旬遂以不起兄何念子之切而不念
親之念我不忘也篤於孝者其忍有是耶吾宗之爲
嶺人今四世中罹喪難先行零謝幸而吾三從昆弟
勝冠者今亦有二人各家子姪且誥誥天其或者悔
禍以祚吾家歟昔我宗大父茅山先生懷寶遜世在
家行政兄以先生家孫早承家庭之訓性又質木愿
慤粥粥若不諧時俗者能篤守吾家孝謹之風羣弟

子姪迪之以仁雅有違忤者輒詭笑無校予心敬之
以爲兄得居長之道宜可取法焉若天假之年吾宗
其庶幾乎長於宗者如是吾宗其有望乎孰謂天猶
未悔其禍復極吾家耶何兄之宜壽不壽宜其子孫
之衆多而只有一子承家也慟矣慟矣夫人之適遠
而有相見期者猶躑躅惘惘有不忍別之恨甚或出
涕沱若語刺刺不能休今吾兄捨平生之所居歸厚
夜之無晨吾安得不懺嗟夫訣而繼之以失聲長號
迎耶殘杯菲羞兄其庶歆之

祭家仲萬春文

嗚呼仲和天道草矣四時變矣陽氣奮發百物昭蘇
君何一去幽閨而莫知返也其已魂遊上清骨肉歸
陰而不復爲陽界物耶嗚呼仲和君何遽至斯也慈
氏之攢柩在殯家兒之冤死未葬君何遽至斯也毀
而致死君子戒之君亦讀禮者豈有是哉君曾游羅
情鍾之痛潛疚暗傷肝腸已爛而遭此巨創遂不能
保命歟抑天偏疾于我奪我相將使此餘生無所聊
賴歟嗚呼仲和人孰無兄弟吾與君兄弟而無麗澤
之友人孰無兄弟之喪吾喪君若警者之失相一樓
殘喘悵悵焉其誰依俚嗚呼仲和聲音面目日漸悠

漢兩愴怳記憶如隔異世忽然森在眼前宛其笑語
夢耶真耶嗚呼仲和一歲十二月一日三十日一日
十二時何時而可忘君哉何事而不念君哉嗚呼仲
和尚忍言哉昔歲丁酉先君棄世王考年薄六旬而
吾年十四君十二季君纔二歲門戶淒涼將老無人
當時景色行路尚涕惟是王考忍痛含冤篤意課教
余時已讀經史君則略學通史而屬文之際才思穎
發已在吾先年甫十六恰成科場練铘宗大父茅山
公亟稱之曰此兒文詞華紆儘可早闡且長於行文
倘能及時肆力非但止於世俗攻取之文而已王考

亦心喜之日以勸教二孫爲事或忘先君之不在旣
吾與君次第成立眼前勝冠者二人王考之心於是
少慰時或拭涕而戒之曰汝父子殞家業隕隲老吾
日夜之望惟汝等汝等須體汝亡父之遺願念汝老
祖之苦心勿以旣冠爲事畢篤志勤學期於立身則
吾雖死庶可瞑目嗚乎不肖無狀不能適遵至意有
所成就越歲丁未王考卽世吾與君俱是弱冠子子
無依出八街恤而何幸王母在堂慈氏年彊內外諸
翰慈氏親自管攝斬斬有序教戒吾兄弟專心攻學
不使撓奪於冗翰雜務不肖少時喜著小數與隣少

爲戲慈氏親見羣少大加呵責羣少皆赧然退散慈氏泣且戒曰先舅遺訓丁寧在耳汝輩其忍忘之耶時又答教之不以已冠而少假辭色吾與君遂絕意局戲至今見人爲之輒生厭心惟我慈氏慈女而兼嚴父之教吾男妹五人皆嚴事之不敢以慢容褻語陳於慈氏之前微矚顏色待降解乃敢戲笑余性鈍樸不能下氣怡色君惟慈詳溫柔自兒時迄老大一不見忤於慈氏余心服之竊欲學得而未能也嗚呼仲和惟吾與君平日無可取於人者能持心謹厚不敢有恃慢之行文不能有所做就而粗守先業不至

隆失者皆吾王考與慈氏訓迪之功也始吾與君同
事科場三十餘年吾有得有失君能諉輒有中而見
屈於南省年過三十始得小成是豈可謂粗伸其志
哉嗚呼仲和天之命君何其薄哉連生四子而畢竟
俱惡有才無人而卒不大闡吾所期君者壽也又奄
室此天之難謀有如是耶嗚呼痛哉喪難之極胡至
斯棘前年中夏三家連染吾與君皆望六之年遭此
毒疹幸卒良已余以不救愛孫疚懷君每寃書之曰
慈氏無恙兄弟三人俱入順境彼懷抱中物何足介
意容俟平定舉酌相賀於慈氏之前八月中慈氏又

意是疾日夜祝天而誠孝淺薄奄遭終天之痛攀號
莫逮五內崩裂初終之際內外親黨皆畏忌不相近
季若又入峽不及三哭之日凡續楔殯殮無人相捐
吾與君叫天擗膺親自執事雖在忽忽墮迫之中君
能舉措精詳隨事盡節不失其宜吾亦視以爲則不
至於迷亂失措變出倉卒百事苟于五日之後始克
成殯初意板木梓難校心且計運窆蘆峽合窆先兆
情禮俱當遂斷意用薄板而歲飢力綿初計難成改
圖權占近阡改棺之節蹉失時月所定新兆又被人
梗夙宵焦痛皇皇奔走閨月末間吾又重得寒疾轉

八危境君以藥然瘠容竭心救治頑命得蘇又以營
窆觸冒風寒不遑食息余於病中見君瘦黃心竊憂
之十月十二日君往見鋤月占山夕來問余夜渡歸
家翌晚不來問之則已病矣其夜家兒又病一室兩
病魂魄飛魄散而惟是君之心性骨法必非先我而死
者曾不以君爲慮而兒病日重七日而逝惡其親凶
事而視有疾仍絕不相問兒殮之明日君又逝去天
乎鬼乎胡寧忍此奪吾愛子已是不忍又祿吾賢弟
之命使吾惇惇無依重抱無涯之痛於旬日之內者
獨何心哉冤乎痛哉以余之受氣虛薄者濱死不死

以吾弟之沉澁精實吾兒之緊靜年富者先我而逝
是豈其命數之天閼歟實亦吾之誠意不及於君行
負神明移禍無辜也痛矣奈何嗚呼仲和君嘗喪子
無嗣忽忽無世念嫂氏抱病有朝夕之慮余悲問之
周旋用力遂空似續前年三月冠而有室君之後事
於是有托曾未歲暮遽至於斯有子而纔定一年之
誼取婦而未受三日之饋君之身世何如是奇薄歟
聞君臨死累呼新婦在傍憾矣情也嗚呼痛哉丁未
以來禍難孔酷三十年間疊裝層出粵至于今極矣
家事傾圯如水無津而能牽補扶持不至顛隳者惟

君之力也每當大事余實怔然失措君惟料量終始
克底于成君今棄余遭罹之棘又有甚於前以余老
鈍其何以獨濟之也君於病中無一言及家私諄諄
不已者惟大事遷就天命近止孝思哀閔至情當然
而儘亦念吾之無能多病者恐不能事事也誠知其
如此吾何獨顧念死兒之未殮而及君一息之未絕
不聞告訣之語也嗚呼痛哉吾與君有苦心所在而
未及經理者先考墳塋漠在絕峽世故多繼或至數
年闕省不肖兄弟在世猶尚知此後來孱孫其何能
源源乎竊欲及此未死之日移窆近地君今不在誰

與共濟季和家事顛敗無餘而滿室幼穉無所依賴
且漂遭罹逆境無心治生時或營為動輒挪掄丁芻
兩兒零丁孤苦生計寥落而年過授室俱未成立惟
茲數事皆慈氏之所眷念而未嘗忘者每與君於邑
竊歎求其所以扶濟之道未有得也君今不在誰與
分憂喪禍之役移卜新居天未悔難降割逾毒方欲
須君問社遠舉令其已矣我安適歸先代行蹟散逸
無傳後世子孫寥落莫徵方欲與君收拾劄錄編為
家乘今其已矣於何相確嗚呼件和為先之事處家
之政文字之述言行之記觸處生疑其誰迪余嗚呼

孝友純明之行信義篤厚之資慈良豈弟之容周徧
敏達之才文詞之瞻麗器局之沉澁求之流輩儘不
多得使君能早致顯途出爲世需其必有隨事了辦
不在人後者而門衰運剝命不相謀卒至窮阨以死
寧不怛然痛心哉嗚呼涉秋徂春三踰葬月而事故
層梗未達料理仍之以饑饉盡室頽顛而轉拖時月
遂至于今哀此獨何處號訴當食噎咽當夜淚枕
苟使余死而君在寔事遷就豈如是耶前日所占之
山術家疑之捨而他求陶沙局內三易其地卜得癸
坐之原以爲慈氏之宅差下其前將附兒葬南踰一

國又定君兆親山所占被人禁闢相持浹月蹉失期
日今君之山又生駭機世變之極一至此哉天若見
哀事歸于順三世幽宅一處相比人間至樂地下重
圓君如不昧其不以是為慰耶嗚呼仲和前陪慈氏
後從吾兒扶老孺幼歸寧先考君則有喜其奈我何
嗚呼仲和五寸之年兄弟之樂悅如一夢而今日送
歸不忍孔懷之痛惟願來生復為兄弟偕老湛樂以
續前日未盡之歡則死有先後何足深悲嗚呼仲和
惟我與君自幼曾無物我之別及有妻子不廢膝下
之心吾兒儘好不失家素君每稱之以克家之兒君

今奄忽兒又夭殞異時遺子遺孫將何所觀感而不
墜家行歟嗚呼余年過半百餘日無幾百憂叢身幹
蠱無子悽婦冤哭朝暮斷腸人生到此不如無生而
累代先祀無處可傳滿室諸穉無人可迫所以抑情
保命以待餘年天其或者悔禍副余之望歟嗚呼仲
和慈氏眼前列侍嬉笑可復見乎學社文堂聯步攜
遊可復爲乎出門踽踽在家涼涼獨生於世何處開
懷嗚呼仲和情溢辭感痛切語錯君其知之歟醴齊
素需遵制像生君其歆之歟

訣家季世春文

冤乎痛哉豈爾其命禍由吾延兄弟四人並殞吾前
天維祿吾爾何辜焉窮獨垂老所賴惟汝今汝又逝
吾誰依處汝如有知應不瞑目先人典刑惟汝髣髴
今焉已遠於何更覲悠悠痛冤曷有其極欲哭無益
不哭難抑將何爲心莫如無訛亦不自由慟矣奈何
哭族姪宗福文

嗚呼痛矣萬衆之生皆歸於死先王有制服盡情已
死不必哀情或不脾我之哭爾痛切子視嗟茲薄命
老無繼嗣四世傳宗載輪于躋烝嘗有主賴君識義
顛木之曳其葉昭蘇我是爲聊渾忘昔吁嗣孫長立

一命相期閱其差池蓋虞吾衰我耄而昏覆謂俟時
何意今者天極匪惟宜死不死方茂反萎冥理之錯
而家之索念爾姿受閭然其焯慈良之性孝悌之行
治家處族各適其當不擇濕燥事事職職嗟我門宗
隕替削弱兄弟并實子姓且微所恃惟爾又奄其歸
伊誰云將哀哉余獨如軀失手若車折軸而天所使
萬事一哭是惟勿說爾家何爲鶴髮在堂潛痛欲漸
弱聲稚孤號擗失依有弟稚蒙誰與相持童指不服
百務頽隳若何支存行路且悲老夫時往汪然涕垂
維暮之春余伏山庵衰病沉淹彌月廢餒爾來自外

送言診膳只聞其聲不覩其面願言之懷如水滔滔
爾歸不淹我心如熬云何以然是乃永訣英兒隨寓
焉是教學相維纔旬人事倏變死生之際父子不見
人理斯極言之腦塞平生罪積飽經逆毒今茲之痛
人所罕有喪雖族少情則失傾人之致唁幽淚漬襖
髮披兒累鑠我腸肚爾如有知想應於悵嗚乎已矣
長言何益先壟之側幽宅載卜泉裏千秋魂庶其慰
地家有忌藏未完旣權而且遽儀不及物豈曰無憾
瞻聞俱憾不以筋力徒費心煎父事心情全未酬焉
雖生卽死何嗟何辜八十衰喘朝暮且殊相會不遠

魂兮其須一脩長辭世事漚沤

訣亡子宗元文

冤乎痛矣而之寄於世今二十二余年已五十三余
先有病數旬幾死而甦而呻疾七日而逝天之殺活
人何其錯歟五十者濱死不死二十者而反閔焉家
之禍福未可知也冤乎痛矣而生之明年丙辰而母
氏逝而之哺母乳纔歲期生不識母之面母父之母
日夜呱呱嚙飴滫如乳而生亦艱矣哉而兄得年
十一而夭而姊亦未笄而殤而父之所恃者惟爾及
而冠而室宜且有男克岐嶷余與慈氏竒愛之日

抱携戲嬉慈氏之側前年秋天降我割岐嶷者折慈氏棄世而之哭慈氏異乎人之哭父之母其惟母父之母而不識其母而然乎今而棄而父歸而母其而不忍戀母之情棄而父如遺歟而之方病連呼慈氏惟願速化父子之恩亦重矣何其忍哉而殯之明日而叔隨之家無人焉而父餘生於何依賴累世遺業何所傳專歟冤乎慟哉而母氏血胤其無子遺于吾家歟以而母氏之幽德天不釐一子以食其報惟厥罰在余躬冤乎痛矣吾家自先以文獻稱而頗不失吾家世類遺脉余懶於教迪且而多病惟望保命他

不願也而能自力庶有進取之期且其介然心性足
可保守家業余行負神明使而至此又不得保而子
以承先人之緒余實爲之而又何尤冤乎痛矣前年
七月零而兒前五日瘞季君之嗣纔一旬葬而叔今
又將奉慈氏柩車躡行東出而扶而棺哭從之設祖
之前三日天又極爾弟英達之命禍變瘳毒迄可少
休猶未悔禍焉何哉骨肉之藏一猶難忍而前後六
寔萃余一身人而忍當是歟而父其惟一推無情物
歟能眠食視聽猶人人而忍為是歟一寸利刃常暗
刺心肚若是而何能父於世也吾知朝暮見而於九

原之中而其無以捨我先歸焉悲也

墓誌銘

處士裴公墓誌銘

公諱星斗字樞伯其先蓋達城人高麗佐命功臣玄
慶之後也後世有諱應駁仕宣廟朝壬辰亂守清
道招募義旅安集一方錄勲爲原從一等號安村鶴
沙金先生狀其行是生諱尚益受業於寒崗先生文
學爲士林推重官至通訓大夫全羅都事號癡巖是
生諱幼華以孝行薦署官至禁府都事號八斯無子
取族子爲嗣諱晉龍從仕郎是於公爲皇考妣孺人

金氏正郎堯欽之女繼妣孺人李氏士人世俊之女
妣淑人成氏卽定惠公稷之女也公生而俊爽異
凡兒其在襁褓定惠公見而竒之謂淑人曰此兒骨
相如此必振其家聲五歲遭金孺人喪哀慕號泣如
成人見者皆嗟歎出涕七歲受小學一聞音義通敏
警解不待課教能自力究索已知是書之爲最切於
人倫日用也禁府公重愛之及禁府公歿時公年甫
九歲不離殯側哭泣奠獻一隨長者未嘗有違戊辰
歲從仕公棄世公歆粥饌鹽以終三年羸毀成疾遂
卒於家其年十月某日葬于郡東五里鶴峴卯坐之

原公生於 孝廟乙巳某月某日歿於 肅廟庚午
七月六日得年纔二十六嗚呼惜哉公天資本義見
解夙寤其居喪盡誠之行治書檢身之方已著於童
穉之年而動合繩規無媿古人又其文藝早就不徒
爲詞章誦習而已使其老壽加工充其志業則於君
子所謂遠且大者亦庶幾焉豈不重可悲哉配孺人
東萊鄭氏士人自重之女後公七年而歿附于公之
墓左無子女以仲弟星漢之子是禧爲嗣有二男一
女銘曰

受中之責彛則是守暴棄無聞雖壽不壽嗟哉裴公

闕而不朽稱年盡分行宿德耆鶴山之陰有屹其墟
我銘斯藏維以詔後

遺事

宗大父茅山先生遺事

先生天姿英銳兒時從學於表兄荷塘先生與蒼雪
先生同隸蒼雪公作詩句已識體調先生常自視
歆然時王考雙溪府君寓居聞州先生往省之仍畱
半歲淹讀通鑑一帙爛熟成誦於是文識日富歸與
蒼雪公同述作而才思湧出句法清奇蒼雪公驚歎
以爲不可及先生於文眼目甚高不循古人軌範天

然獨到格力奇峻於詩尤得其簡潔清新之妙當時
流輩皆以爲莫及嘗曰吾東自羅麗以來至于我朝
間有文章傑然者而皆脫不得東人習氣其排布力
量終不及中華作者之一斑蓋文章氣也而偏邦之
人受氣局自不遠於大家關鍵也詩則或不無優入
晚唐者而亦不多得生於吾東自期於不朽之文者
可謂妄也泰春兒時侍坐於隅有一少年來言曰往
候趙玉川丈於門外聞有讀書聲琅然不輟八門則
其文止讀掩卷竊覩是韓文也其文之老而彌篤誠
後生所不可及也先生乃曰玉川之力讀韓文可謂

浪費衰精雖做得文章好將何用之老境看讀莫如
治心之書韓文恐不切也

先生燕居未嘗廢書而論孟庸學循環溫讀至如詞
章之書雖韓柳歐蘇不為耽看

先生意思超然不循流俗對子孫雅言教詔惟修身
制行之道至於功名利祿則絕不語及秦春十六歲
時當科期村人皆治行奏春亦爲風聲所動請行于
王考不見許秦春向壁而泣先生適來見之正色責
之曰汝不讀論語學而優則仕之訓乎仕宦猶俟學
優況科舉乎汝今科工未就故汝祖不許其赴汝當

恭受祖教益致工課以俟其優不此之爲妄生躁進之心志尚如此何可以遠大期之耶

先生於王考爲從父兄弟而友愛之情無異同胞老而彌篤日相對怡悅憂患喜樂與之同焉丁酉歲先君早世王考衰年痛割不自堪忍先生日夜同處慰勉備至及營窆許以先夫人塋下盈尺之地先期親往檢看窆事又出山下位貲以助不給其至誠眷顧類多如此

先生性介疎於治家而爲先之事則用心勤摯蔚峽先山舊無藏獲先生經理辦備多置田庄且買守墓

之奴時歲莫掃之際無窘束之患

聞州蔚邑先塋距家皆百里餘往來甚艱而一年一省未嘗廢闕年歲之後亦然

先生見識超詣平日論議未嘗有動於浮言乙巳三月疑艘登陸之說自寧海始起以爲倭寇猝至傳相驚擾一日之間沿路數郡雲騰波沸至有婦女竄伏山谷間或埋主藏貨時書院有考文事一縣長老咸聚自宣城來者以賊鋒明日當到川城之書殺急傳報舉座莫不惶惶失色或發生丁不辰之歎而先生獨泰然不動據理而言曰方今南寇無警必不犯順

此乃荒唐之說不以當自息何其洵悞也歸家痛戒
子弟以鎮之故吾家獨晏然安坐不數日亂果定帖
每於月朔及望日早起率子弟詣宗展拜各家祠廟
因八內堂咸聚老少諸婦從容敘話雖幼少兒女亦
皆召致列坐問其所事諄諄有教

先生容貌峭古氣像清高望之直是峻截難攀而接
引訓誨之際藹然一團和氣興荷蒼輿翁三先生道
義交契自少甚密雖其言論風旨不爲苟同而趣向
大致終歸於一世稱川城四老

家狀

曾王考處士府君遺狀

恭定大王別子第二孝寧大君諱補生寶城君諱咨
生東陽正諱徐生江城都正諱堅孫生縣監諱孝彥
追贈左承旨生司諫院獻納諱景燦以直諫名
昭敬世號退憂堂事在趙龍洲所撰碣文生龍驤衛
副護軍諱愷文行高潔落拓不羈號旅庵生郡守諱
晉哲清修有文章遺稿藏于家號雙溪是於府君爲
皇考妣曰昌原黃氏貳相諱士祐之曾孫水庫別提
諱暉之女府君諱雲紀字瑞卿生於莊穆三三年
乙丑某月日卒於彰孝王九年戊申三月十五日

享年四十四甲辰遭先大夫府君喪漸毀成疾沉綿
五歲而歿配真城李氏吏曹參判松齋先生諱竭之
六世孫曾祖諱亨道祖諱彝有文章配興陽李氏吏
曹參判蒼石先生諱堦之女考諱裕後有文行早世
配清州鄭氏左議政藥圃先生諱琢之孫清風子諱
允穆之女墓在聞慶西面辰谷里東向之原考妣同
壙雙墓寔岳林洪氏先兆主岡之後麓也不肖嘗聞
之先君曰府君十三始學學之三年文書已就今詩
稿一卷在子孫句法雋爽茅山大爺嘗稱之曰叔父
於詩蓋天才也木齋洪公輓府君曰多君誠孝出天

眞詞藻翩翩更絕倫千古詩人因毀死向來惟有李
于鱗不肖早孤無知識侍王考數十年未嘗以先古
事蹟仰質於讌誨之暇而遽抱終天之痛今於府君
之遺事誠昧昧焉無所取正隕心追慕痛恨愈切而
於祖妣則生卒年紀尚不能追記其言行事實將何
據据據而論撰之乎遂不敢別立狀辭只書其先系
歿日而並編於府君之狀嗚呼痛哉一男諱棟成娶
安東權氏生一男二女男卽先君女適生員丁謙慎
士人裴是禧先君諱師尚娶咸陽朴氏生三男二女
男秦春萬春生員世春女士人丁志宣權思敬

王考處士府君遺狀

府君諱棟成字碩材又字仲擣號曰省齋 太宗別
子孝寧大君諱補之九世孫 昭敬朝直臣諱景燾
之玄孫也曾祖諱懌龍驤衛副護軍祖諱晉哲光海
時釋褐入槐院始事 莊穆三高介潔貞官止郡守
考諱雲紀有文行早世妣真城李氏吏曹參判松喬
先生諱堦之六世孫處士諱裕後之女也府君生於
顯仁王十年己亥九月十八日丙子生十歲曾王
考王母相繼而歿伯仲季皆早歿府君孤寄母家子
子無依值辛亥大侵從一奴依於川城伯父公時年

十三伯父公篤加教養視以已子從兄茅山公友愛
隆至常與共寢餐及至成立伯父公醮而聘之於同
里處士權公諱滋寔冲齋先生諱撥之五世孫也夫
人柔嘉淑明甚得婦道伯父公仍割田以資之於是
始有產業遂贅居焉至戊辰歲夫人棄世時先君甫
七歲伯姑九歲季姑纔免襁褓其年冬府君染痘疾
欲外姑金夫人至誠救治疾遂良已府君平日對子
孫言當時事未嘗不於邑曰聘母於我有慈母之恩
繼夫人豐川任氏處士諱世禎之女貞憲公諱權之
玄孫夫人克續前人之德愛養稚孤順事府君家道

自此漸肥及先君成立服勤就養克盡幹蠱府君遂以家政聽之先君顧閒自適送老逍遙治園林植花竹與從兄茅山公怡然相樂於其中每於令節招邀杖屨飲酒以娛一時貴遊名勝多從之嘗名其齋曰日省以寓暮年修省之意蒼雪權公作記嘆熒之府君溫雅踈朗謹順遜約與物相裕而自飭恒若不足居家行事不出乎彛倫日用之則而見於聲音顏色者和而能簡潔而不隘使人望之可愛而敬是以人無怨惡而教行於家庭之間雅好幽適不樂芬華日端坐對丹課教兒孫閒暇蕭散享清寒之樂三十餘

年丁酉夏先君卽世而無他子弟不肖景弟皆在孩
幼府君處之夷然不以疚懷自是無心幽玩攬去茅
堂花卉曰園林勝賞亦富貴事如吾薄命豈合爲此
遂杜門簡出勸教諸孫未嘗少懈暇則作程文以導
之間以前言往行反覆教誘又嘗切禁交遊曰不事
讀書徒交結朋遊不失其身者鮮矣不肖或夜讀不
倦輒忘寢坐聽或得雋課製喜見顏色呼先妣使見
之府君雖篤愛不肖尋常侍側未嘗示眷戀態每乘
其瞋瞬輒撫摩頂背覺則使之誦讀府君才分甚高
詞藻簡雅少時一屈南省不復應舉晚更留意詩文

得趣輒吟茅山公稱之曰君詩高處吾所不及吾家
無祿自僉樞公以來漂轉客寄文蹟散逸曾王考及
先君皆早世世業寥落而幸府君與茅山公彌年壽
康訓迪子孫又砥礪名行通遵祖範每月朔望必晨
起率諸宗祗謁家廟壓席中堂宗族諸婦序次拜謁
子姓少長環侍聽戒古家遺風餘法至今在子孫者
皆二祖教也凡爲二祖遺孫者其能無忝而不墜吾
家孝謹之風歟府君卒於上之四年丁未十二月
十八日其年十月十六夜遂懷示不肖曰功名苦不
早歲月如轉梭吾年迫七旬汝輩盍勤磨嗚呼此臨

年訓戒也詞意悽惋懇惻眷眷以功名期之而汲懼
其不及見死生大變必前兆自知者然耶嗚呼痛矣
府君享年六十九墓在松生丁向之原階下以次附
者即前後二夫人之墓也有一男二女男即先君女
長適生員丁謙慎次適士人裴是禧先君有三男泰
春萬春世春萬春中庚申司馬二女丁志宣權思敬
丁謙慎有三男志完志安志寬一女朴孝述裴是禧
有二男憲佐憲佑一女鄭樽嗚呼府君雖早失怙恃
零丁孤苦而能立家業以垂裕後昆是慈仁豈弟之
德固宜丕迎天休晚年遭罹已是人理之所不堪又

不能安樂壽考及其寢疾之時萬春隨先妣歸寧不
肖獨在侍湯疾革之最尋醫而返已不及考察嗚呼
痛矣前時無故侍側兄弟俱在歡樂嬉戲迺今親愛
骨肉相繼棄背孤露獨存拚慕莫逮之痛到老逾切
遂叙次平日濡染所及以寓儉然如見之感後世子
孫庶可因此而求我祖範之萬一焉

祖妣孺人安東權氏遺狀

祖妣姓權氏其先永嘉人也永嘉之權自太師幸得
姓以來凡九百有餘年世多達官聞人號爲大姓五
世祖忠宣公諱撥以貞忠大節歷事恭僖榮靖恭

憲三朝載太史是生龍宮縣監諱東美是生義興縣
監諱采是生龍驤衛護軍諱尚節是生處士諱滋是
於祖妣爲皇考妣豐山金氏察訪諱昌祖之孫通德
郎諱時準之女祖妣生於顯仁王八年丁酉某月
某日歿於英烈王十四年戊辰二月二十一日享
年三十二墓在松生洞南向原與祖考墳同岡階下
第二墳寔祖妣墓也嗚呼祖妣歿之時先君纔七歲
不肖生十四先君又下世我祖妣淑行懿德其誰歷
傳以詔遺孫今不肖將叙次先蹟而於祖妣事昧昧
如希古時其終闕而無傳數焉乎痛矣不肖兒時先

妣道先君之言曰下氏姊典刑酷類先妣不肖亦猶
及見丁氏姑儀容纖長舉止嫺雅姿性簡潔晶粹至
今森然在目此是像想我祖妣容貌辭氣婉然是古
之賢婦人也凡爲祖妣之子孫者據此而擇之庶可
徵其柔德淳容歟不肖於此感懷逾切而增於悵遂
据先君稱歲思慕之言以爲祖妣狀

祖妣孺人豐川任氏遺狀

祖妣任夫人籍豐川 恭僖朝名臣貞憲公諱權之
六世孫也貞憲三世載名臣錄爲世顯姓曾祖諱慶
進從仕郎祖諱惲考諱世楨有文行配安東權氏考

諱益三祖妣資性寬柔媛夷任氏既世族古家遺訓
在于孫習於心目又皇考處士公教養有法長則有
賢行及笄歸于我祖考時先君姊妹俱孩幼失恃所
親愛念飢寒疾痛者無人及祖妣歸始有母愛皆歡
嬉忘其孤苦戀慕不忍斯須離一門內咸曰賢哉母
也祖考素羸弱多疾凡飲食起居之節衣服寒燠之
宜必竭誠適進以保養之又順承志意奉祭必以誠
接人必以恭不以貧窶而有闕丁氏姑早殞有子女
并皆鞠養之尤篤憐其融解兒常置懷中不厭勤苦
又篤仁好施踈親戚屬待之如一聞人有善言善行

輒出涕歎嗟藹然其性也不肖兒時嘗見小篋中有
小學翻解一部以示諸孫曰此先考手筆所以教予
者也皆古人嘉言懿行雖女子不可不知時時教讀
女孫祖妣生於 彰孝王八年丁未十一月十六日
歿於 上之十五年己未九月十三日享年七十三
墓與祖考墳同原寔權夫人階下墳也嗚呼痛矣以
我祖妣仁德純行終未有血胤子孫古人云有德者
必有報何其舛哉今內外本支雖不繁能各保性命
以延後昆者皆我祖妣殷勤顧育之所遺也後世子
孫其可一日忘昊天罔極之恩耶嗚呼痛哉

先府君遺狀

先君諱師尚字士元初諱綢號月溪先祖曰孝寧大君諱補太支第二也與兄讓寧大君俱抗秦伯仲雍之節爲世所稱曾祖諱晉哲通訓大夫行瑞山郡守操履峻潔不苟諧世位不大進祖諱雲紀有文行早世考諱棟成隱德不顯妣安東權氏冲齋先生諱撥之五世孫處士諱滋之女繼妣豐川任氏貞憲公諱權之後處士諱世禎之女也先君生於英烈王八年壬戌四月二十七日生七歲妣權夫人歿先君幼而多疾任夫人盡其止慈之愛至誠鞠養遂至成立

先君資性寬裕溫仁風儀頎如眉目秀朗文藝早著
楷法亦精爲一時儕流之所推挹而見翹於先生長
者吾家無祿曾王考羈贅早世王考幼孤漂轉世業
寥落而王考恬靜養拙未嘗營立產業先君念親老
家貧以餘力勤心經理克贍滫瀡隨之資奉先接賓亦
無闕乏待人接物一出誠悃僕隸隣里咸得其歡心
凡有所事莫不竭誠赴功而家道日肥當是時王考
妣偕老康寧先君治家有法不肖男女五人嬉戲膝
下一室內和樂熙熙時歲娛暇賓客坐集款晤永夕
不肖自能食能言侍側十餘年間未嘗見有虞戚之

日人皆稱道先君之仁善宜享權禧丁酉夏世春在
融祿得驚悸疾疾漸危先君謂先妣曰苟活此兒家
之福也蓋以世春幼而偶爽也先君日夜焦心治之
及蘇先君繼邁始知爲時疹王考與王母率不肖男
弟而出避先妣獨與數隸診護六月二十五日先君
棄世嗚呼先君臨命呼僕詔之曰今吾已而汝其治
吾殭殮沐浴必須潔淨衣衾必須整齊暑月之寒不
可淹時且須忽忽殮木我死之後家事無托汝其誠
心服役毋使老親勤慮先妣平日常以是泣語不肖
不肖時無知識尚於悒隱痛至今遺言丁寧在耳當

時事歷歷在目。高終天至痛。先妣嘗訓戒不肖曰。而
之先君困於貧窶。雖不能專力進取。文行志尚。爲當
世大人之所稱賞。而等須體而先人心。毋以碌碌持
身。以篤學做就。爲期不肖無狀。氣質魯下。卒無所成。
萬春才譽。夙著庚申秋。選博士弟子。聞喜日。先妣泣
而對背曰。而能少遂先人之志。未亡人獨見今日。何
以爲心也哉。嗚呼。痛矣。先君事父母孝。而勤處宗族。
和而敦嚴。於居家信於交友。所與遊皆一時之聞人。
韵士。歿之日。遠近聞者。莫不流涕嗟悼。雖皂隸下賤。
亦然。及其葬也。族舅蒼雪公哭之以詩曰。嘉禾向晚。

期成實碧蕙先秋遽隕芳正字權公夢誅之曰翩翩
高舉蛻濁世而無瑕謙謙自持行古道而不怠粹然
眉宇之如玉藹然風味之如蘭豈弟子諒之心蓋出
本性耿介清修之行殆絕其倫持身心以溫恭不事
違幅待人一以誠愛無假皮毛志於學游於藝慎於
言辭資實近道孝于親悌于長信于朋友行亦過人
嗚呼此亦可以見先君懿行之萬一先君享年三十
六王考旣傷割又以一瘞疚心宗大父茅山公悲憫
之許其先夫人墳下以葬之卽蔚州蘆田之南向原
也先妣咸陽朴氏天曹郎諱從鱗之七世孫處士諱

希賢之女先妣嫠孀四十餘年上奉舅姑下育諸孤
涕泣劬勞管攝內外能使家業不蹶間以課督諸孤
不至失學有子男三人泰春萬春世春女二人丁志
宣權思敬其壻也泰春前娶安東權氏處士諱正誼
之女生三男一女二男及女未成早歿一男宗元纔
冠而死只有遺腹女後娶義城金氏士人諱龍河之
女生二男三女一男二女早歿萬春娶原州邊氏處
士諱有建之女生二男三女男及一女歿以族子宗
翰為嗣世春娶安東權氏士人諱蘊之女生一男三
女男歿後娶夏山成氏處士諱協寅之女生一男二

女丁志宣有二男長載器次未娶權思敬有二男昌
度章度嗚呼先君仁厚之德宜其有年有位卒之獲
落無成而嗇其壽又宜其餘慶之餘絳丁氏女青年
短折于姓歿闕又如是存壽而萬春以先妣歿之歲
十月逝去天道好德之報何其爽歟抑不肖孤行負
神明而受其殃歟嗚呼不肖以刼餘殘喘死且無日
恐一朝溘然則先君之懿德純行後世子孫何從
知之迺敢追記兒時見識之所及者與夫先妣所
之教略叙始終如是是惟存十一於千百遺子孫
庶或因此而得其影響焉嗚呼痛矣

先妣孺人咸陽朴氏遺狀

先妣咸陽朴氏系出新羅高麗時有諱忠佐事肅王
以儒學顯入國朝世多聞人達士曾祖諱履華進士
祖諱游有文行考諱希賢隱德不顯妣禮安李氏考
諱民標龍驤衛副護軍先妣生於 英烈王七年辛
酉十二月六日二十二歸于先君四十三年丁酉六
月二十五日先君歿先妣與先君同禍僅十六年嗟
呼痛哉先妣性簡而莊落落不苟不事婦人媚細事
先君順適承意未嘗違忤居室之間相對恪慎十六
年如一日先君下世王考年薄膏粱諸孤皆穉孩無

知先妣主管家事凡蒸嘗之需滫瀡之資必先時度
備固有虧闕王考匙治不健滋味失宜輒不强進先
妣常躬適厨饌小心忠養王考進膳乃敢自飧賓客
日至或冰夕款晤或倉卒責需而承命卽辦顏色不
厭所進盤品咸適老人皆安意久留使王考之心懽
愉快適治家御僕斬斬有序不責小節雖親子孫未
嘗施姁姁之愛宗嫗戚屬待之如一丁氏姑早殞諸
孤在王母膝下者篤施矜恤無間己子婢僕有罪不
少寬恕恩亦不衰方是時家口殷盛充庭滿厨先妣
親執饋事曲有恩意值辛亥大侵日作蕎粥以活百

口而均濟隣里之飢者常曰家道和乖專由婦人余
事先姑四十餘年未嘗一忤於先姑姊妹之間亦未
嘗有拂而一室之內同心和睦又曰妬忌婦人之惡
德一有此心非但於妾媵為然雖姊妹姊妹常加恨
疾讒言由起家道不寧豈非大可懼哉教育諸孤不
使浪遊王考下世之後益加嚴課專心攻學而不使
撓奪於冗幹雜務不肖兒時喜著小數與隣兒為戲
先妣泣且誡曰汝等早失慈父豈可效豪華家況先
舅遺訓其忍忘諸時又嘗教之不以冠而少假不
肖兄弟皆嚴事之不敢以慢容褻語陳於先妣之前

微覲顏色先妣色降乃敢嬉笑惟我先妣慈母而無
嚴父之教訓迪不肖如是至焉而自幼及老荒墜至
意無一事可道不肖之罪可勝喻哉丙辰冬不肖喪
耦有女年纔十二二子一在孩提一在襁褓先妣皆
置之懷抱辛勤鞠養不避溷濕兒呱呱戀乳則日飴乳
以嚙之兒既長女教組紉男勸課讀未嘗以孤榮焉
念而弛其訓提之方癸亥春丁氏妹來覲殞逝有二
子方孩世春又有失母四兒先妣并皆收養之前後
顧育內外凡九孫雖年幾長皆置膝下滿室穉孤啼
呱喧嬉寢則爭衾襯體食則扶床競哺有不堪其苦

者而左顧右復不憚劬勞不肖罪積于天子及女相繼夭閔世春又喪其一子皆過於傷痛或至廢食先妣戒之曰死生壽夭命也何爲作此無益之悲徒傷其生而不顧老母之心乎男子有許多事如是其可期乎泰然不以爲憾加餐以勉不肖嗚呼生死憂樂隨遇安命而不爲戚戚動心今於先妣見之矣嗚呼先妣篤於孝友不肖兒時見渭陽使來則先妣奉王母手筆輒拭淚看下看畢奉棄篋笥思至則必出而泣讀王母年深之後歲必一覲未嘗以路遠多故而廢庚戌夏王母下世舅氏兄弟一時俱歿窆之

節無人主管先妣與李氏從母先期而進經紀大事
克致無憾之誠李氏從母孀居窮約漂寄無定乞其
田以居之日夜湛樂老而逾滋置則賙濟疾則分痛
隣人為之感歎乙亥冬李氏從母有疾逾歲沉重先
妣朝暮往候歸必涕泣曰女子各出垂老同處人所
罕有幸吾兄弟至老相依今兄病如此後死獨存何
以為心丙子夏家有疹氣盡室連染先妣出避仲男
家至八月中先妣患疾誠孝淺薄竟遭終天之痛卽
八月二十五日也嗚呼痛矣先妣慈仁德厚通達識
備愛育之恩不偏於子姓周徧之行不止於中饋敦

睦著於宗端訓誡嚴於家庭閨門仰爲儀則隣里服
其誠信夫茂四德而潔百行爲女中之君子者非先
妣之謂乎又嘗眷眷於不肖兄弟科業戒之曰先舅
平日期待汝等汝等須體先意識心篤做成功在天
惟當盡吾之所當爲已而不肖兄弟或深夜讀書輒
親持食物以饋之曰得無飢乎聞有科期則預備資
具以待之雖歉辰匱節未嘗以無貲停行凡係科事
必親自辦措不使婢僕不肖兄弟屢中發解輒屈南
省則曰小成亦天也豈可妄覲其勿沮氣益倍其工
爲士赴舉士之職也嗚呼先妣淑於慮後嘗曰無母

諸孫雖各有父不見慈母之愛之情豈非可憐遂經
紀私物以昇之宗元以襦襦幼孤艱難成長尤可矜
念凡栝橈手中之物皆別貯藏中曰他日將以賜宗
元之婦及宗元有室而宜且有丈夫子先妣遂以爲
喜而竒愛之曰此未亡人慶也丙子夏先妣在寓之
日宗元之兒以毒痢夭宗元亦以其年十月死天之
不報我先妣仁厚之德何其薄哉嗚呼痛矣先妣享
年七十六先妣平日嘗語不肖曰而之先人之墓棺
不用漆我死凡附於身者無踰前喪以安已化者心
又必先君絹衣一襲遺之曰須以此納子棺以贊下

從而無以非禮而不爲也遂遵治命殮用白棺遺服
納于絞衾之上以明年四月十八日權窆于文山下
鰥庵之西麓先妣薨艾之年黨面童髮視聽不衰起
居康健手不釋組紉疾病之日猶強進飴餌而神精
不減惟諄諄語幼孫冤死不已無一言以遺不肖疾
革數日遽至大故嗚呼痛矣先妣有子男三人女孀
二人丁氏女並其夫先夭閔仲男萬春持先妣喪
皇皇三月而逝今不肖孤與季弟世春權氏孀妹荀
延碩命奄過七年而形容寢遠聲啜莫追懿德純行
之可傳於來裔者恐逾久而逾失乃敢涕泣哀述以

示二弟亦以垂後世子孫老病遺忘雖未能備述然
像想儀形而不可及者卽此而求之則庶幾百儉然
羹墻之慕而少慰焉爾

春村先生文集卷之三

春村先生文集卷之四

附錄

行狀

思澗與春村公同里閭且有先人契誼日造其門候起居公以澗粗獷豕亥受知甚厚及病且歿以其遺集見屬顧其事太鄭重未敢日公之孫玄祚又以遺事示澗且泣而語曰吾王考懿德熾行丈人之所知也宜可表顯於世而伏而不耀且歲月滋久先輩之知吾王考者落落如晨星惟丈人在失今不圖將泯泯焉終無徵也願丈人幸有以詔之也玄祚請奉而

謁銘於有言之君子也顧潤非其任者雖不敢作為
人文字乎昔荷公謬知付托不效今於玄祚之請天
終始固拒是辜負公知遇之恩又無以塞慈孫血懇
遂不揆僭妄謹撰次世系事實知左以備秉筆者採
擇焉公諱泰春字通甫春村其號也惟我 恭定大
王有三子其仲卽孝寧大君諱補也與兄讓寧俱有
隱德微援父志托迹方外遜位 英廟媿德虞仲其
後珪組相聯世有聞人而皆以清名直節危於時飛
不盡翰四世祖諱晉哲號雙溪早登第知郡事亦爲
黨人所基謝事始落南居于聞州之大嶺下後又徙

居于福州之川城縣遂爲安東人曾祖諱雲紀早世
祖諱棟成號曰省蒼雪權公記其行考諱師尚號月
溪性清修高潔爲朋輩所斂衽不幸早世人皆惜之
妣咸陽朴氏天曹郎諱從鱗之七世孫處士諱希賢
之女英烈王三十年甲申八月十二日生公幼而
器度寬裕骨相豐偉公之宗大父茅山公素有藻鑑
嘗拊背歎賞曰吾家風範賴此兒不墜早孤兄弟三
人公居長及就學外而日省公教督嚴內而母夫人
有孟母之賢總執家事不煩以務惟文學是勸公亦
能婉婉聽從凡博奕遊戲之事一不敢近日以翰墨

爲事文詞大進甫成童已有能聲年十六當大比朋輩皆赴舉公亦欲觀光茅山公諷止之蓋公之才足以應舉而茅翁止之者以其期待不止於小成故也仲氏穎銳夙達公與之同被共硯互相磨礱不待游學而麗澤之資自足於家庭之內是以學日益博藝日益精凡鄉解或聯璧或連榜殆無虛歲人以爲榮而公不自多益大肆力遂成巨儒儒林間文字多出公手其見推於人如此庚申仲氏公登上庠公於功名非數數者猶不廢舉曰親意欲之我不敢自尊爲吾所當爲以竣命而已丙子丁內艱哀毀踰禮幾至

滅性居數月以時疹失家督殯殮纔畢上舍公繼殯
公迺曰吾不自愛與之俱滅則大小喪制誰復爲之
遂自節抑料理尸具營窆哭臨之節式禮無愆人以
爲難服闋不復以進取爲心歎曰吾所以僂僂應舉
者爲親故也今親不在而誰爲寧從吾所好也日以
文墨自娛非甚病未嘗釋手也晚年又淡味吾儒家
語俯讀仰思必究其旨常歎曰至味在此而吾恨不
早悟虛費半生心力取羣聖賢要語拈之屋壁末乃
自署曰雖不得名師畏友以考德而問業道備於我
又其說具在方冊苟吾篤志何患不得昔衛武公年

九十有五猶作抑戒以自警豈可以年之既老而自
畫哉時公年幾八十而其自厲如此公平生不爲皎
厲之行刻削之論又好客善飲酒有客至則不問親
疎必開門歡迎有醕無沽期在輒醉醉或微露風情
間以善謔人皆樂附戶外屢常滿焉一日有客過焉
公爲之止宿接待款厚其人沽酒於肆以餉公公笑
曰主人不能酬客客反酬主是何義也固辭不飲客
執爵強進曰吾見丈人多矣未嘗見如主人文者也
客雖以求乞爲主亦豈無曷飲食之之誠乎公不得
已飲之還其直不受而去中身以前毋夫人尚無恙

兄弟姊妹子姓克堂衍宇怡愉和悅人以福家稱之
此及晚年家禍孔酷凡骨肉之係公憑倚者舉皆剝
奪公巋然孤畸誠人理之所難耐公雖恢蕩自持不
為悒悒狀而心腸實潛疚而暗鑠也由是得關膈症
有時猝劇痛先範之駭微恐後人之因階上自高曾
徫及兄弟姊妹各修遺事以寓懷李氏公亦無子惟
有兩幼女在公取而養之於家及笄具粧奩以嫁又
欲為之立后聞金谷宗氏家有兒當暑欲自往族人
問其老而生病也尼之皆不聽扶曳寸進相持月餘
與疾還家沈綿數月雖不再舉而前後書疏無非刺

骨語卒以得請蓋亦公誠意所感也七月二十七日
竟以是疾終于正寢享年八十二與後夫人同窆于
文山負夏之原公風流篤厚言論和平平生不爲已
甚底事故人亦無怨嗔之言又其孝友篤至母夫人
性嚴有法度非其道不少假借而公能克謹克戒致
悅其心日與兄弟姊妹環侍膝下雜以談諧以順適
其意於兄弟也常翕如也雖與析箸而未嘗有私財
此則人人之所共公誦者若其家裏零行瑣節雖不
可詳知竊嘗耳之於傳誦之口公於門內或有乖爭
之端則必援引義理至誠曉諭使自感悟卒歸和平

其訓子孫則必戒其褊滯而勉以寬弘又常舉不校
不求四箇字語之曰大丈夫當以此爲心此則齊家
訓子之大槩也若言其隱工則於庸學二書尤致意
晝讀夜誦周而複始至於臨化之夕亦誦誠意一章
噫年齡已迫死亡無日而猶念念不置非至篤好何
能如此於此亦可驗我公平日之所養何其肆哉公
先大人月溪公與潤王考無爲齋公爲道義交公能
適追先誼施及後生每見潤輒娓娓道舊事且與之
文談也嘗曰夫辭達而已矣何庸險語奇字以塗人
耳目爲哉今讀其文果乎鋪理勝無險惡語詩亦冲

潛有味真有德者之言也。今其遺集藏于家，嗚呼公之行誼文章，足以顯名當世，淑仁厚德，足以享得純嘏而魔蝎戲命若死蓬蒿，既不羸躬，又不落後。公凡再聘前配安東權公諱正誼之女，後配開韶金公諱龍河之女。前後舉子女不爲不多，而皆不育，惟有一男一女，名宗元，權氏出也；女適務安朴奉權金氏出也。亦皆先公夭逝，公殯之日，未有一箇血肉扶衰而哭。玄祚以過房之孫，終始致孝，生而克其養，殯而乞其狀，公之食報其在斯乎？吁，其可悲也已。

乙卯春三月辛酉，契家子將仕郎前行童蒙教官權

思澗謹狀

輓詞

朴甲慶

去歲中秋月便輿門外至此老胡爲來迎坐笑相視
不見已十載容顏未全瘁雖則未全瘁今年八十二
云胡不自愛此行應有爲答云誠有爲欲說更長喟
吾季死無後餒鬼久無寄不死有老兄那忍不爲地
此間多吾季應念百代誼吾將盡吾誠不得誓不置
誰無十指愛了決良不易相持半月餘悒悒空回轡
俄報疾勢侵此豈纍帟崇居然巷閭空不慙嗟天意
君家昔多人究行世所企如何殄瘁盡忽若霜葉墜

濟濟三昆季而無一血嗣螟孫奉遺語衰袂濕涕泗
有誰不爲動祖意爾能遂三房共一井憂虞可相死
無恙舊堂攜依舊吉蠲饕餮此慰君多因遂寄我淚
內外弟兄親人孰無此懿舍此姑勿道莫逆自少穉
踈狂與厖厚不嫌臭味異吾胸溢古意子曉醲醇氣
娓娓話今昔往往雜嘲戲談經與論文聽雞因念睡
那能無參差捍拒互疵議犂然久相當欲背旋復此
知己古固有曠世乃一值君我獨何幸生併仍交臂
中歲各老大命駕難取次落落曉天星相望如相避
尚記前秋會兩顏猶敷膩臨分各丁寧後期天應與

奄忽在斯須良覲永無自海內零落盡窮廬但孤歎
澆漓此世界何處見德器熏熏昔風味早已書紳識
川城坐寥落文山失舊翠誰不悼云亡應有議私謚
伊昔肱篋讀風風見風致惜哉盛世文無人味大藏
朱絃且莫奏滄哇方恣睢後人善護藏賞音會相嗜
素車一何遲東望徒悲魂一掬知音淚未灑白楊隧
牙絃斷已久郢斤甘終閔哀詩五百字寫以老淚漬

又

權重崙

唐宋文章伯仲間圖書四壁養清閒劉蕢飲墨才非
罪鄧子無兒命所關憂憾何曾移素守避齟能得住

朱顏堪憐十丈青霞氣人與同埋太白山

又

權思勗

浙浙復浙浙歲暮北風急窮陰鎖邱壑櫟樹歸然立
軒窓開白日大翁無出八大翁何處去緬思我懷悵
偉哉大君後非實備以藏春風陌在面錦繡爲我腸
江淹夢綵筆曹劉列垣墻詞壇倚大幟風雨聚筆端
遽觀洞千古耽醜極皇盤定可需當世置之承明樓
奈何風塵世憎命與仇謀常技折名園左對空鳩洲
兩兩庭前玉青山幾埋冤終然好氣象因此倚伏門
那爲憾憾事不學斷腸猿一聽天所命相隨有酒樽

文山月初出梧溪水正肥閒區占廣野曠懷掃塵機
翛然復翛然憂樂百年何新篇響珠璣篇成卧自哦
抑我壯年志伴此東籬花良朋自西東野蔬問幾盤
且可留於我不復慮壺乾相會每相笑隨處盡歡顏
至性元醇厚訓誨心弛寧溪齋坐皐此學臭儘如蘭
名關已透却溪雲杳世間皐鶴本清迴機心空應無
焉能與流輩低回事皮膚窮年以素履衰白信乾坤
自知我有主下惠寧避喧憶昔門櫺日伯父一女歸
因緣似藤葛乘龍欄生輝先子有自別道義以不違
巖亭好明月高駕踰金轡有時鸞嶺寺仙興送斜暉

綃繆互勉勵張弛弦與韋秋風動古壑至音闌渺微
至今二十年往躅尚依依小子偏愚陋笑手荷芬菲
嗚呼其已矣今又鶴馭飛門巷一已空士林咸咨唏
螟孫極孤子三殯一何哀禍福吾難詰報施若此乖
平生江海思飄散浩劫灰精爽遊何處風儀邈難迴
文章在箱篋光價燦瓊瑰子雲渺何代黼黻空藻瑤
劉湖昔棹舟高興和丹臺大道容無能剪拂及駑駘
於今一垂重郢雪落松萊寒燈照梅室此意倚誰裁
惻惻長惻惻人間昔夢悲萬感莫可盡落日拜豐碑

又

權應度

碩德山林在全歸九耄年持身無適莫處世方圓
陳寔宜鄉里陶潛詠葛天淋漓好氣象猶想笑談筵
在世元無數天何賦命偏文章空老篋骨肉已重泉
曠視真高士童顏若老仙監輿難再舉回首涕洟然

又

成彥根

濩落平生且莫悲高齡厚德亦天禧百年歌哭皆詩
料萬事消長任酒卮柳下風敦千載薄庵中文起一
代表傷心最是門前櫟猶向東風細細吹

又

金相敏

文獻川城幾百年休休一老獨歸然茅山家學身心

得南野交情簡牘傳翰墨逢場名下士杯罇到處飲
中仙丹邱昨夜文星晦慟哭斜陽欲暮天

又

權思浩

於君得御望如仙杖屨吾鄉八十年入眼青山罇酒
外滿頭白髮案書前太丘醇德人皆醉邵氏風流世
共傳乘化飄然遊岱日不須憂戚說桑田

川城人物近消磨又哭公亡可柰何文獻西山先德
遠衣冠海國古邱多獨留魯殿扶顛俗忽報莊舟付
逝波菽粟文章餘篋裏誰能收拾好編摩

又

權思溥

前輩盡凋落惟公尚典刑高標霞後見踈韻雨中聽
獨淨晴窗几深窮白首經嗚呼天不慙魯殿竟頽零
地下皆先友人間獨此翁世方趨末俗身欲挽淳風
尚賴扶持力那無詔臚功一朝隨大化吾黨失幃幪
以公之厚德其命也還奇濺淚桑成海寬此酒與詩
容顏猶不改筋力未全衰君子應堅忍吾人可表師
吾家曾立雪先子獨知音契以金蘭密磨仍道義淡
鄙人雖喪質樸紹不孤心杖屨今何處海山倘和琴
歎息有今日如何無怨天詞林長已矣南氣忽蕭然
絳帳虛函席丹邱失老仙事多猶未了臨化少遊年

又

李紱

聞說龍吟歸寂寥年來耆舊太蕭條文章憎達憐羅
隱命道尤天哭孟郊長物平生惟齒德真遊何處去
逍遙川城不是無人巷誰復如公挾漢霄

自少追遊躡後塵年前洞舍起居伸終然一別成予
古薤露淒悲淚滿巾

又

族姪宗植

公在文山重公歿文山輕九原如可作百身贖此行
先型日以遠後生更誰依扶疎櫟樹下無復長者非

祭文

全熙成

嗚呼惟公性質愷悌氣度和柔金精而剛玉尹而孚
從容問學絕意浮躁神明內腴英華外彪早承詩禮
芻豢墳籍百家羣言搜抉貫徹森列在眼磊落載腹
研燈煤積點牀梅發沿洄溯源泛泛珍筏發爲文章
埋到辭約脫去陳腐刊落柔脆傷及時務左右無闕
韓韓棣萼世稱荀龍戰藝千軍勁敵皆空擬騁亨衢
大展才猷一何蹭蹬命與仇謀卞和三則楚國之羞
齊皞不第有司之尤公何病哉人所嗟也況自中歲
禍凡相加夢斷春草淚沾西河晚來光景一何悲涼
手撫螟孫相依爲命人理之極公以達觀付諸蒼蒼

不作臧顏非公誰能可驗所蘊念泊進取樂我教育
一區烟月萬架牙軸朝焉灌圃夕焉焚膏時因興到
隨遇遣懷短律長篇散朗蕭疎齋前小櫟歲暮襟期
優哉游哉永矣不謾白髮韶顏燁若仙真鄉邦所庶
仰如魯觀天不愁遺海籌遠促僊僊後生於何考惠
惟我先人與公分溪不設畦畛其交以心討論情素
商量文字白首相對竟夜移晷小子無狀遭變客館
扶櫬北還痛苦族親丁韻誅語一字千涕從茲以往
撫我偏至先君之思諄諄教戒每拜牀下感舊有淚
小子何忘銘在心肝只緣誠淺拜未源源日公病革

我有南轅淹滯旬月遂失一訣小子所痛公亦爲悲
跳丸不停卽遠有期蔚被銀鳳杖屨所遊距家牛鳴
山明水回卜云其臧延釵相會靈輻載引萬事幻花
想像疇昔知有如無茫茫此世何處更拜虛堂寥落
物色增懷獨留寒月流照梅窓香之升矣惟我之誠
酒之盈矣惟我之淚失聲拜訣公庶歆我

又

權思潤

嗚呼人無耆惠鄉里爲輕醜莠相競各自分庭是非
翬然誰之證評幸而我公巋然魯靈年逾八耄視聽
惟精不激不隨濟以和平坐鎮清俗無踰老成况其

詞華可與文衡揚古托今談詩說經誨諭諄諄爲厥
師程間以善龍微露風情賢愚同得戶外屨盈豈伊
公族里閑爲榮謂言難老惠我後生如何不淑遽爾
逝傾嗟公所遭人亦涕零塵舟未移桑海遽更悽涼
一室白首孤榮人非木石寧不吁嗟雖則理遣實惟
沈冥昇之何厚命何不羸顧余小子出八門屏豈惟
鄰好世交與并不我介外謂我識丁公言不朽奔在
巾簾猥荷謬託如山負茲吾豈敢爾心則斯銘屬茲
啓辰載陳翼旌衣冠永厝邈矣典刑凡有疑義誰與
講明抑其遺教不可復聆緬懷疇曩有淚斜橫敬酌

一觴庶歆我誠

又

趙德立

嗚呼真星夜晦君子云亡風度如在典刑誰憑不造
于躬不售于時八十三年徒然布衣大川喬嶽龍亡
虎逝小子後生于何考緒於乎小子謬託先契時陪
杖屨猥賜色笑山陰故事于華于驚約言已就奄至
不淑歛其琴瑟歸于一邱公又奚憾我懷悠悠春山
斷麓士林齊會物薄情腴一哭而退

又

補申慶

嗚呼送公哭公如昨日事轉頭荏苒蒼祥已至人世

多故尚未匍匐誅句五十粗露臍臆其未竟者叙于
奠文帶送涕淚替聲以宣以公厖厚宜享遐祿而不
一值只得顧羞以公文學何施不宜而不用世頓憾
低垂妙才剋仁天意孰知靈光獨存門戶虛涼無孫
有孫屬汝烝嘗鬼無所歸阿季是悲百里跼蹐誰肯
割慈始而未竟孫能遂之三房鼎居無恙舊宅是為
能塞後死之責顧此無祿何辜于天殤鬼在夢今一
七年才求嗣孫冠冢有期世味久盡始復生滋人生
于世圓滿者誰有無血胤何必多較苟無乏祀庶免
不孝公我情地一何類之而可相賀亦可相悲窮廬

歲晏百感交集海內零落久已啜泣今又失公我懷
焉薄雖有古意待誰相告雖有好懷爲誰而陳雞窓
軟語已作前塵畢此餘日復誰知我低眉泯默只得
學啞待到春妍準擬策羸世故多端其又可期東望
傷神有隕如泉幽呻隱痛有死方痊精爽不昧庶其
歆旃

又

族姪宗迪

我家南來嶺外孤枕雙溪懿烈邈矣難繼茅爺遺範
寢以隕替幸而有公克旣前軼孝友爲政喪食詩禮
推以接物溫厚遜悌種學織文蔚爲大儒妙齡聲發

雷掣風驅青雲平步門望人期竟不大售時命之職
中歲運剝志難何奇鶴原痛墨西河淚漸公惟抑遣
一任天劑堪人不堪可驗學力劬書益勵老至忘食
撥讀經史鑽研閩洛充養既至符彩外發韶顏白髮
燁若老鶴居然九耄筋力靡脆行不須杖坐不憑几
謂享期頤永厯諸族何天不愁奄啓手足小子多辜
先人早世惇惇含恤弱植霜餘公閱偏苦眷愛周至
依仰靈光以事父事時拜軒屏頻垂教戒教戒維何
曰惟敦睦援引古先恐或墜厥縱不體行于心佩服
今焉失公於何考德風儀漸遠教誨邦聞哀此餘生

其胥淪秦寧不痛泣我運之蹶嗟公厚惠報施何戾
閱盡桑海餘禍又締哭婦喪儷曾未周歲白首血泣
潛消暗疚一疾之警命也難究日月有期青島載卜
雙旌後先雲日錯莫一山同隧九原調瑟在公何憾
後生之惻矣此菲忱敢薦洞酌靈其不昧庶賜歆格
右集先生所手編而屬我信天大爺者也其後又
再經手而三易本分爲六卷傳寫之際不無聲近
字似之誤今年春與二三同志更加讐校約之爲
四卷蓋從簡示久之意也於是先生嗣孫命周甫
與其族兄瓚周氏募工繡雙溪茅山兩先生集先

生遺集次第踵成因忽念吾曩時嘗拜棄翁於病
革中翁汪然出涕曰吾年薄七旬死亦何憾曾王
考遺稿尚在巾衍中歸不瞑目矣到今追惟耿耿
若昨日耳聞而倏已三十星霜矣顧余晚生幸而
無死獲參今日之役惡得無誰昔之感耶於乎先
生學行之篤文詞之富信翁之狀盡之矣小子何
述焉而古人所謂三不朽信知其非僨言也遂不
揆僭越略記顛末以附卷端歲玄馬端陽月永嘉
權載璞謹識

春村先生文集卷之四終



